

1 CORINTIOS

San Pablopa K'art'a Naapiara P'ãda Corinto P'uurudepema Ijãapataarãmaa

Introducción

San Pablo, Jesucristopa jirit'eradapa na k'art'a p'ãji, Éfeso p'uurude bak'ãri. P'ã pëiji Corinto p'uurudepema ijãapataarãmaa. Pablo Jesucristo ũraa jaratee nipak'ãri judio–eerã t'ãide Corinto p'uurude, mãirã ũk'uru Cristode ijãa p'anejida. Corinto p'uuru waibia baji Grecia eujãde. Mama eujã k'ĩra t'ãdoodeepa net'aa aneedap'edaa netopachida. Ichiaba mama p'anapachida awaraa ak'õre waibia apatade ijãapataarã k'ĩra t'ãdoo. Maperã Cristode ijãapataarã nepĩra k'ĩra t'ãdoode baaipachida. Pablopa na k'art'a p'ãji ãra ũraait'ee, jĩp'a Jesucristode ijãapataadamerã; ãchi p'ek'au k'achia oo amaadamerã mãik'aapa chik'inia p'anapataadamerã Cristopa k'inia bik'a.

Naapiara Pablopa gracias jara bi Tachi Ak'õremaa ma Corintodepemaarã pari, Jesucristode wãara ijãapata perã (cap. 1.1-9). Mamĩda t'ẽepai ãra itria bi k'ĩsia awara–awaraa p'anapata perã, chik'inia p'anada–ee (caps. 1.10–4.21). Ichiaba ãra itria bi ãchi t'ãide p'ek'au oopataarã ichiak'au bipata perã mãik'aapa charraarãmaa nepĩra ateeppata perã, t'ãri auk'a bidai k'ãyaara Cristopa k'inia bik'a (caps. 5–6). Jara bi sãga miak'ãi p'aniĩrã p'anapataadaipia bi (cap. 7) mãik'aapa sãga p'anapataadaipia bi ijãadak'aa beerã ãchi ik'aawa p'anapataarã ome (caps. 8.1–11.1). P'anau bi Corintodepemaarãpa iidi pëidap'edaa, k'awa k'inia p'anadak'ãri sãga oodaipia bi chip'edaidak'ãri it'aa t'ĩpataadait'ee (cap. 11.2-16). Ichiaba jara bi ijãapataarã nek'opatade Cristo piuda k'irãpadak'ãri (cap. 11.17-34); sãga p'anapata wãara chik'inia iru p'anapataarã (cap. 13) mãik'aapa Tachi Ak'õre Jaurepa ijãapataarãmaa ne–inaa oopiparide (caps. 12 y 14). Jara bi k'ãata jara k'inia bi Jesús piup'eda chok'ai p'irabaida irude ijãapataarã–it'ee (cap. 15). T'ẽepai jara bi sãga p'arat'a p'edaipia bi awaraa ijãapataarã k'aripadait'ee mãik'aapa ichia k'ĩsia iru bi ooit'ee (cap. 16).

Salude pëida

1 ¹Mi, Pablo, tachi ñpema Cristo k'aurepa Sóstenes ome na k'art'a p'āruta. Tachi Ak'õrepa k'inia bada perã, mi jirit'eraji Jesucristopa pëimerã ichi ũraa jarateede. ²Mia na k'art'a p'āru parã ijãapataarãmaa Corinto p'uuruude p'ani. Parãpa Jesucristode ijãa p'aneedak'ãri, Tachi Ak'õrepa parã awara biji ichideerã p'aneedamerã. Mãga oopari jõmaweda na p'ek'au eujãdepemaarã ome, Jesucristomaa it'aa t'ĩdak'ãri. Mãgã Tachi Poro Waibia Jesucristo ãra Poro Waibia pai ichiaba. ³Mia k'inia bi Tachi Ak'õrepa mãik'aapa Tachi Waibia Jesucristopa parã pia ak'ì p'anadamerã. Mãgã k'ãiwee p'anapataadait'ee.

Tachi Ak'õrepa Cristode ijãapataarã pia ak'ì bapari

⁴Ichita Tachi Ak'õremaa it'aa t'ĩ bak'ãri parã pari, mia jarapari: “Ak'õre, pi t'ãri pia bi Jesucristode ijãapataarã pia ak'ipari perã.”

⁵Cristode ijãa p'ani k'aurepa Tachi Ak'õrepa ne–inaa jõmaade parã Corinto pidaarã k'aripaji. Pia pedeeji iru ũraa jarateedamerã. Ichiaba poro wësaapiji k'awaadamerã irua oopi k'inia bi ichide ijãapataarãmaa. ⁶Tachi Ak'õrepa mãga ooda perã, parãpa waapiara Cristode ijãajida, taipa naaweda jarateedap'edaa k'ãyaara. ⁷Ma awara Tachi Ak'õrepa ma jõma ooda perã parã–it'ee, parãpa oodai ne–inaa jõmaweda iru Jaurepa oopi bik'a ichideerãmaa, Tachi Waibia Jesucristo cheit'ee ewari ni p'ani misa. ⁸Tachi Ak'õrepa parã pia ak'ì bapariit'ee Cristo cherumaa, ma ewate iru k'aurepa parã k'achia wëe p'anadamerã. ⁹Mãga ooit'ee ichia jaradak'a oopari perã. Parã jiriji ichi Warra Jesucristo ome araa p'anapataadamerã.

Ijãapataarã k'isia awara–awaraa p'anadap'edaa

¹⁰⁻¹¹Ma jara aupada jõmaweda wãara mĩda, Cloe tedepemaarãpa mimaa k'awapijida parã nepirade para bi, auk'a k'isiada–e p'anadairã. Ñpemaarã, Tachi Waibia Jesucristopa mi pëida perã, jüríti mi ũraa! T'ãri auk'a p'anapatãati, aupedeeda–ee, Cristode ijãapata perã. Óoti irua oopi bik'a ichideerãmaa. ¹²Nãga mimaa nepirijida. Ijãapataarã ùk'uruurãpa mãgapata: “Mi Pablo eere bi”; awaraarãpa: “Mi Apolo eere bi”; awaraarãpa: “Mi Pedro^a eere bi”; jõdee apemaarãpa: “Mi Cristo eere bida” apata. ¹³Cristopa ichide ijãapataarãmaa mãgã awara–awaraa k'isiapik'aa. Mi, Pablo kususode piu–e paji parã pari, p'ek'au k'achia wëpapiit'ee. Parã poro choopidak'ãri, mi t'ide poro chooda–e paji. ¹⁴Mi o–ia bi Tachi Ak'õre k'irapite parãdepema Crispo mãik'aapa Gayo aupai poro chooda perã. ¹⁵Mãgã mia chok'ara–ee poro chooda perã, parãdepema apidaapa p'oyaa jarada–e mi t'ide poro choopiji. ¹⁶Ichiaba Estéfanos te pidaarã

^a 1.12 Arameo pedeede *Pedro* jara k'inia bi *Cefas*.

poro chooji. Māgiirā awara mia waa k'irāpa–e. ¹⁷Cristopa mi pēi–e paji poro choode. Jīp'a ichia ooda māik'aapa ūraada jarateedeta pēiji. Māgi ūraa mia k'isia k'awaa pik'a jaratee–e, ijāadamerā mi pedee wēsaa jaratee bipa. Ma k'āyaara t'āri pia jarateepari k'awaadamerā Jesucristo kurusode piuji eperāarā o k'achiadeepa k'aripa atait'ee.

Tachi Ak'ōre jōmaarā k'āyaara k'isia k'awaara bi

¹⁸Māgi jarateeda maarepida ūri k'iniada–e p'ani Cristode ijāadak'aa beerāpa, āchi–it'ee māgi jarateepataarā pariatua pedee p'anadairā. Mamida tachi ijāapataarāpa māgi jarateeda ūridak'āri, p'ek'au k'achia oo k'iniada–e p'anapata, k'awa p'anadairā Cristopata tachi ma o k'achiadeepa k'aripa atapari. ¹⁹Māga k'awa p'ani Tachi Ak'ōre Ūraa p'ādade jara bairā: 'Mia ak'ipiit'ee na p'ek'au eujādepema k'isia k'awaa beerāda apata wāara māga p'ani–e, āchia k'isia iru p'anik'a mia oopi–e pak'āri.'

(Is 29.14)

²⁰Tachi Ak'ōrepa māgi p'ādade nāga jara k'inia bi. Eperāarā ūrapemaarāk'a, poro wēsaa p'ani jida māik'aapa pedee wēsaa pedee p'ani jida, k'isia k'awada–ee pik'a p'ani Tachi Ak'ōre k'irapite, iru jōmaarā k'āyaara k'isia k'awaara bapari perā. ²¹Tachi Ak'ōre māga bapari perā, na p'ek'au eujādepemaarāpa iru p'oyaa k'awada–e āchi k'isiadoopa. Maperāpi Tachi Ak'ōrepa Cristopa ooda eperāarā k'aripait'ee taimaa jarateepiji, ūk'uruurāpa k'isia p'ani mīda tai k'isia k'awada–ee p'ani. Mamīda chi ijāarutaarā taipa jarateepatade o k'achiadeepa uchiadait'ee.

²²Judiorāpa taipa jarateepata ūri k'iniada–e p'ani, ak'i k'inia p'anadairā ne–inaa Tachi Ak'ōrepa ooru eperāarāpa p'oyaa oodak'aa. Jōdee judio–eerāpa ūri k'iniada–e p'ani, k'isia k'awaa bipa jarateedata jiri p'anadairā. ²³Mamīda tāipata jarateepata Cristo kurusode piuda p'ek'au k'achia wēpapiit'ee, judiorāpa ijāadaamaa p'ani pījida māik'aapa judio–eerāpa ichiaba ijāa k'iniada–e p'ani pījida, tachi k'isiadeepa pariatua jarateedai jīak'aapa. ²⁴Taipa māga jarateepata k'awa p'anadairā Tachi Ak'ōrepa jirīmaa bi judiorā māik'aapa judio–eerā paara Cristode ijāadamerā. Irude ijāadak'āri, k'awa p'aneepata iruata k'awapipari Tachi Ak'ōrepa k'isia iru bi māik'aapa oopipari Ak'ōrepa oopi k'inia bik'a eperāarāmaa. ²⁵Tachi Ak'ōrepa māga k'isia iru baji na p'ek'au eujādepemaarāpa k'isia p'ani mīda irua ne–inaa pariatua ooji Cristo piupik'āri. Tachi Ak'ōrepa Cristo peedap'edaarā ome p'oyaa–e pajida apata. Mamīda irua māga oopik'āri, ak'ipiji ichi wāara jōmaarā k'āyaara k'isia k'awaara bapari māik'aapa ak'ipiji ne–inaa jōma p'oyaa, māgā tachi o k'achiadeepa k'aripa atada perā.

Tachi Ak'ōrepa eperāarā jirit'erada

²⁶Īpemaarā Cristo k'aurepa, k'isīati parā p'anapatap'edaade, Tachi Ak'ōrepa parā jirīi naaweda. Parā t'āide Tachi Ak'ōrepa eperāarā

jirik'ári ichide ijãadamerã, chok'ara jiri—e paji nãgee: k'ísia k'awaa beerã na p'ek'au eujãdepemaarãpa jiripatak'a; p'arat'ara beerã maa—e pirã eperãarã poro waibiarã. ²⁷Mãgeerã jirit'erai k'áyaara, Tachi Ak'õrepa jirit'eraji eperãarã mak'iara k'ísia k'awada—ee beerã, na p'ek'au eujãdepema k'ísia k'awaa beerã k'íra nejasia p'aneedamerã úridak'ári irua jarapida mãirãmaa. Ichiaba jirit'eraji eperã jíp'aarã, na p'ek'au eujãdepema poro waibiarã k'íra nejasia p'aneedamerã úridak'ári irua oopi bi mãirãmaa. ²⁸Jirit'eraji na p'ek'au eujãdepema eperãarã chupiria beerãda apata. Mãga ooji ak'ípiit'ee pipiara bi Cristode ijãaru, k'ísia k'awaa bai k'áyaara, p'arat'ara bai k'áyaara mãik'aapa eperã waibia bai k'áyaara. ²⁹Mãga ooji Tachi Ak'õrepa, apida audua p'ananaadamerã ichi k'írapite. ³⁰Tachi Ak'õre jõmaarã k'áyaara k'ísia k'awaara bapari perã, tachimaa k'awaapiji Cristopa ooda tachi k'aripait'ee atuanaadamerã. Cristopa tachi neto pik'a ataji uchiadamerã p'ek'au k'achia jua ek'ariipa. Mãpai irude ijãadak'ári, Tachi Ak'õrepa tachi awara biji araa p'anapataadamerã iru ome. Mãgá p'ek'au k'achia wêe p'aneejida Tachi Ak'õre k'írapite. Ma awara mãgá Cristopa tachimaa k'awapiji Tachi Ak'õrepa oopi k'inia bi. ³¹Maperãpi Tachi Ak'õre Úraa p'ádade jara bi: 'Eperãpa jara k'inia bi pirã ichiata ne—inaa k'awaara bi awaraarã k'áyaara, mãga jaraipia bi ichia k'awaa bairã Tachi Ak'õrepa iru pia ak'i bapari.'

(Jer 9.23-24)

K'ísia k'awaa bipa ichi k'íradoopa apida Cristode ijãapi—e pai

2 ¹Ípemaarã, mi parãmaa wãk'ári, jarateeji Tachi Ak'õrepa jara peída; irua naaweda k'ísia iru bada ooit'ee Cristo piuda k'ap'ia. Mãga jaratee—e paji poro wêesaa bipa jarateeparik'a maa—e pirã k'ísia k'awaa bipa jarateeparik'a. ²Ma k'áyaara jarateeji Jesucristo kurusode piuda tachi p'ek'au k'achia wêpapiit'ee. ³Mãga jaratee bide mi p'era baji, parãpa mia jararu úri k'iniada—e pai jãak'aapa. ⁴Jaratee—e paji k'ísia k'awaa bipa jarateeparik'a, ichi pedee ijãadamerã. Mãga—e. Tachi Ak'õre Jaurepata mia jarateeda parãmaa ijãapiji, ichia jõmaweda p'oyaapari perã. ⁵Ak'õre Jaurepa mãga ooji parãpa k'ísianaadamerã eperãpa jarateeda k'aurepa ijãa p'ani. Jíp'a ijãa p'ani Tachi Ak'õre Jaurepata ijãapida perã.

Tachi Ak'õre Jaurepata k'awapipari ichia k'ísia iru bi

⁶Taipa parãmaa jarateeda—e paji k'ísia k'awaa beerãpa jarateepatak'a. Mamída mãgá jarateepata Tachi Ak'õre pipiara k'awa k'inia p'aniirãmaa. Jarateedak'aa ijãadak'aa beerã k'ísia k'awaa beerãk'a maa—e pirã ijãadak'aa beerã waibirãk'a. Áchi piudak'ári, áchia jarateedap'edaa mak'iara k'irãpadak'aa. ⁷Áchia jarateepatak'a jarateedai k'áyaara, taipa jarateepachida Tachi Ak'õrepa k'awapida taimaa; ai naaweda ne—inaa

eperãarãmaa k'awapi–e pada. K'awapiji ichia k'isia iru bada ooit'ee Jesucristo k'ap'ia pari na eujã ooi naaweda. Ichiaba k'awapiji jõma ichia k'isia iru bi tachi–it'ee, it'ari panadak'ãri. ⁸Tachi Ak'õrepa ichia k'isia iru bada k'awapi–e paji eperã waibia beerãmaa, mägiiãra pa ijãada–e pada perã. ãchia mãga k'awadap'edaa paara, Tachi Waibia kurusode peeda–e pak'aji. K'awak'ajida iru cheji Tachi Ak'õre k'ira wãree unupide na p'ek'au eujãdepemaarãmaa. ⁹Ma awara tachia k'awa p'ani Tachi Ak'õrepa mägiiãra k'awapi–e paji ichia k'isia iru bi ichide ijãapataarã–it'ee, iru ũraa p'ãdade jara bairã:

'Tachi Ak'õrepa nãgí ne–inaa k'isia iru bi teeit'ee ichi k'inia iru p'aniãrãmaa: ne–inaa eperãrãpa waide unudak'aa; waide ũridak'aa; mãik'aapa waide k'isiadak'aa.' (Is 64.4)

¹⁰Chonaarãweda Tachi Ak'õre ũraa p'ãdak'ãri, k'awada–e p'anapachida irua k'isia iru bada. Mamãda Tachi Ak'õre Jaurepa ne–inaa jõma k'awapari perã, mãgí k'isia paara tachimaa k'awapii.

¹¹Eperãpa ichi k'isia k'awapari ichi t'ãridepai. Mãga pik'a Tachi Ak'õre Jaurepa k'awapari Tachi Ak'õre k'isia. ¹²Mapa tachi ijãapataarãpa Ak'õrede ijãadak'aarãpa k'isiapatak'a k'isiadak'aa. Tachi Ak'õrepa ichi Jaure pëiji tachimaa k'awapimerã ne–inaa jõma irua ooit'ee bi tachi–it'ee Jesucristo k'ap'ia pari. Ak'õrepa mãga oo–e paji tachia ne–inaa pia oopata perã. Jíp'a ooji tachi k'inia iru bapari perã. ¹³Maperã taipa jarateedak'aa tachi k'isiadoopa. Jíp'a Tachi Ak'õre Jaurepa jarateepi bik'a jarateepata. Mãga ũridak'ãri, ijãapataarãpa k'awaa wãpata Tachi Ak'õrepa k'isia iru bi ãchi–it'ee, ichi Jaure ãchi ome bapari perã.

¹⁴Mamãda ijãadak'aa beerãpa mãga ũri k'iniadak'aa, ãchi–it'ee tachi k'isiadoopa pariatua pedee p'anadairã. Ma awara ãchia Tachi Ak'õre k'isia p'oyaa k'awadak'aa, Tachi Ak'õre Jaure wëe p'anapata perã.

¹⁵Tachi Ak'õre Jaure iru p'aniãrãpa ne–inaa jõma ak'idai k'awaadait'ee pia wa k'achia Tachi Ak'õre k'irãpate. Mãga oodai Ak'õre Jaurepa ãra k'aripapari perã. Jõdee Tachi Ak'õre Jaure wëe beerãpa mãgá p'oyaa ooda–e. Ma awara ãchia p'oyaa k'awada–e p'ani Tachi Ak'õre Jaure tachi ijãapataarã ome bapari wa mãga–e, iru Jaure wëe p'anadairã. ¹⁶Tachia k'awa p'ani ijãadak'aa beerãpa Tachi Ak'õre net'aa p'oyaa k'awadak'aa, iru ũraa p'ãdade jara bairã:

'¿K'aipa k'awaaima Tachi Ak'õre k'isia mãik'aapa k'aipa iru ũraaima? Iruata ne–inaa jõma k'awapari.' (Is 40.13)

Mamãda mãga–e tachi ijãapataarã ome. Tachiata k'awaadai Tachi Ak'õre k'isia, iru Jaurepa tachi k'isiapipari perã Cristopa k'isia bik'a.

Tachi Ak'õre ũraa jarateepataarã auk'a mimiapata iru–it'ee

3 ¹Ïpemaarã, k'irãpãti mia jaratee nipada parã ome bak'ãri. Ara nawepa ichi warra chai ewaa t'odamaa chik'o k'opi–e bik'a, chik'o

waide p'oyaa k'o—e bairā, māga pik'a mia jaratee—e paji Tachi Ak'ōre Jaure taarā iru beerāmaa jarateeparik'a. Māga oo—e paji parā at'āri pia ijāada—e p'anadap'edaa perā. ²Maperāpi nawepa ichi warra chai jutopiparik'a chik'o waide p'oyaa k'o—e bairā, māga pik'a mia jip'a jarateepachi Cristo piuda eperāarāpa p'ek'au k'achia oopata wēpapiit'ee. Jaratee—e paji jōma irua k'isia iru bi tachi—it'ee, k'awa bada perā parāpa waide māga p'oyaa k'awada—e pai. ³Māga p'ani pāchia oo k'iniata oo p'anadairā, Tachi Ak'ōre Jaurepa oopi k'inia bi ooda—ee. Iru Jaurepa jarateepi bik'a oodai k'āyaara, aupedeepta, Tachi Ak'ōrepa jarateepataarā pēida audú k'ia p'anadairā. ⁴¿Jara p'ani—ek'ā: “Mi Pablo eere bi?” maa—e pirā “Mi Apolo eere bi”? ¡Parā ijāadak'aarāk'api k'isia p'ani!

⁵Mi, Pablo Apolo ome eperāarā poro waibiarā—epi; jip'a Tachi Ak'ōre mimia oopataarā, parāmaa jarateedap'edaa Cristode ijāadamerā. Taipa Cristopa oopidak'a jarateejida. ⁶Eperāpa ichi eujāde ne—uuparik'a, mia naapiara parāmaa jaranaji Cristopa ooda eperāarā k'aripait'ee. Māpai ne—uu ak'iparipa ooparik'a, Apolopa waapiara jarateepachi k'awaadamerā Tachi Ak'ōrepa parāmaa oopi k'inia bi. Mamīda Tachi Ak'ōrepa ne—uu jōmaata waripiparik'a, iruata taipa jarateedap'edaa parāmaa ijāapiji. ⁷Ne—uuparipa māik'aapa ne—uu ak'iparipa ma ne—uuda p'oyaa waripidak'aa. Maperā ma ne—uuda waripipari āra k'āyaara waibiara bi. Māga pik'a Tachi Ak'ōre waibiara bi tai jarateepataarā k'āyaara, irua aupaita eperāarāmaa ijāapipari perā. ⁸Ma ne—uupari ma ne—uu ak'ipari ome auk'a mimiapachida chaumerā. Māga pik'a tai mimiapataarāpa auk'a jarateepata eperāarāpa Tachi Ak'ōrede ijāadamerā. Mamīda Tachi Ak'ōrepa tai chaachaa p'aait'ee ichia k'inia bik'a, taipa oodap'edaa pari. ⁹Tai ma mimiapataarāk'ata p'ani. Jōdee parā ma ne—uudák'ata p'ani. Mamīda Tachi Ak'ōreta ma eujā chipari. Parā ijāapataarā ichiaba te choma pik'a bi; te Tachi Ak'ōrepa oopimaa bi ichi mimiapataarāmaa. ¹⁰Tachi Ak'ōrepa k'inia bada perā, mi pēiji ma te choma ewaa oomerā. Maap'eda awaraarā mi t'ēe chejida ne—inaa awaraa parāmaa jarateede. Mamīda pia jarateedaipia bi. ¹¹Mia māga jara bi Tachi Ak'ōrépata ichi Warra Jesucristo bida perā ma te choma te basak'a bamerā. Irua aupaita tachi o k'achiadeepa k'aripa atai. Mapa apidaapa awaraa basa jiridaik'araa bi. ¹²Ma basade te oodai nāgí net'aa pi—ia bidee: nēedee, p'arat'adee, wa māu pi—iadee. Maa—e pirā ma te oodai pak'urudee, p'ūajara p'oo bidee wa siadee.^b ¹³Mamīda Ak'ōre ewari waibia ewate irua ma te oopataarāpa oodap'edaa ak'it'ee māik'aapa jarait'ee pia wa k'achia. Pia jarait'eera, irua taipa

^b 3.12 Pablola nāga jara k'inia baji: Te jip'aade basa pi—ia bi mīda, ma te oopataarāpa made net'aa pia—ee bīruta pirā, ma te choo—e pait'ee. Māga pik'a Tachi Ak'ōre Ūraa jarateepataarāpa irua jarapi bik'a jarateeda—e p'ani pirā, āchia jarateepata choo—e pait'ee. Jōdee net'aa pia bīruta pirā, ma te chooit'ee. Māga pik'a Ak'ōre Ūraa jarapataarāpa jaratee p'ani pirā Tachi Ak'ōrepa jarapi bik'a, āchia jarateepata chooit'ee. Maperāpi jarateepataarāpa pia jarateedaipia bi.

oodap'edaa chaa m̄aik'aapa jarateedap'edaa chaa ak'iit'ee. Ma ewate ma ne–inaa j̄omaweda t'ip̄itaude w̄ayaait'ee. ¹⁴Cristopa taimaa oopida m̄aik'aapa jarateepida paa–e pait'ee. Chooit'ee. Tachi Ak'õrepa m̄agí pia ak'iit'ee m̄aik'aapa m̄agí pari teeit'ee ichia k'ĩsia iru bi teeit'ee Cristopa oopidak'a oodap'edaarāmaa. ¹⁵Mam̄ida eper̄arāpa āchi k'ĩsiadoopa oodap'edaa maa–e pirā jarateedap'edaa j̄oma paait'ee w̄eparumaa. Mam̄ida net'aa ēt'a atadak'a t'ip̄itaudeepa, ma jarateepari atua–e pait'ee. Jip'a beeit'ee Tachi Ak'õre ome. Mam̄ida Ak'õrepa ne–inaa teeit'ee pada ichimaa w̄ee bait'ee.

Tachi Ak'õrede ij̄apataarā iru t̄ek'ap̄i p'ani

¹⁶Tachi Ak'õre ichi te waibiade baparik'a, ichi Jaure bapari parā ome. Maperā parā iru t̄ek'ap̄i p'ani. ¹⁷Maperā apidaapa parāmaa ij̄aa amaapiruta pirā Cristode maa–e pirā oo amaapiruta pirā Cristopa parāmaa oopi k'inia bi, Tachi Ak'õrepa m̄agí k'achia ooit'ee. M̄aga ooit'ee, parā j̄irit'era atada perā ichi–it'ee, ichi te waibiak'a p'anadamerā.

Tachi Ak'õrepa k'inia bik'a p'anapataadaipia bi

¹⁸Pāchi itu k'urap̄ināati. Parādepema apidaapa k'ĩsiadaik'araa bi āchi k'ĩsia k'awaa p'ani na p'ek'au eujādepema k'ĩsia k'awaa beerāk'a. Ma k'āyaara k'ĩsia k'awa–ee pik'a p'anadaipia bi na eujādepemaarā k'irapite, Tachi Ak'õrepa ichi k'ĩsia parāmaa k'awapimerā. ¹⁹Na p'ek'au eujādepema k'ĩsia k'awaa beerāpa jaradak'āri āchia ne–inaa k'awa p'ani, Tachi Ak'õre–it'ee āchi k'ĩsiadoopa pariatua pedeepata. Tachia m̄aga k'awa p'ani iru Ūraa p'ādade jara bairā:

'Tachi Ak'õrepa k'awa bi na p'ek'au eujādepema k'ĩsia k'awaa beerāpa k'ĩsia iru p'ani chīara k'ūradait'ee.' (Job 5.13)

²⁰Ichiaba iru Ūraa p'ādade jara bi:

'Na p'ek'au eujādepema k'ĩsia k'awaa beerāpa j̄omaweda k'awa p'ani choo–e pait'ee.' (Sal 94.11)

²¹Tachi Ak'õrepa m̄aga jara bairā, apida audua p'anadaik'araa bi k'ĩsia p'anadairā āchi eerepema jarateeparita pipiara bi apemaarā jarateepataarā k'āyaara. J̄omaarāpa parā auk'a k'aripapata, ma–it'ee Ak'õrepa āra p̄ida perā parāmaa. ²²Irua mi, Pablo, Apolo m̄aik'aapa Pedro p̄iji taipa Cristopa ooda jarateedamerā. M̄aga ooji parā awaraa Cristode ij̄apataarā ome pipiara p'anapataadamerā Cristopa k'inia bik'a. Tachi Ak'õrepa na p'ek'au eujā ooji tachi aide p'anapataadamerā. Tachi o k'achiadeepa k'aripa ataji it'aa wādamerā jai–idaadak'āri m̄aik'aapa pipiara p'anapataadamerā na eujāde p'ani misa. ²³Ma j̄oma ooji tachi–it'ee, tachi Cristodeerā perā m̄aik'aapa Cristo iru Warra perā.

Tachi Ak'õre Ūraa jarateepataarā ichiaba Cristo–it'ee mimiapata

4 ¹Parāpa tai Cristo–it'ee mimiapataarāk'a iru p'anadaipia bi, iruata tai jarateede p̄ida perā Tachi Ak'õrepa k'ĩsia iru bada; ne–inaa

eperãarãmaa naaweda jara–e pada. ²Irua tai mágá pëida perã, chok'ek'ee p'anadaipia bi. ³Parã maa–e pirã awaraarãpa mia ooda mäik'aapa jarateeda ak'i k'inia p'ani pirã k'awaadait'ee pia wa k'achia, ak'idaipia bi. Mia p'ua–e bi. Mamïda michia pida mia ooda mágá ak'i–e bi. ⁴Cristopa jarateepidak'a parã t'ãide jarateepachi perã, k'isia p'ua–e bi Tachi Ak'õre k'irapite. Mäga jarak'ãri, jara k'inia–e mia maarepida ne–inaa k'achia ook'aa. Tachi Waibiapata mia oopata ak'iit'ee mäik'aapa jarait'ee pia wa k'achia. ⁵Mägá mia ooda Cristopata ak'iit'ee perã, ¿sãap'eda taipa oopata ak'i k'inia p'anima parãpa, Cristo cheit'ee ewate pai naaweda? Ma ewate ichiata k'awapiit'ee ne–inaa jõma eperãarãpa waide k'awada–e p'ani; ne–inaa eperãarãpa ãchi t'ãridepai k'isia p'anadap'edaa paara, na p'ek'au eujãde nipadak'ãri. Maap'eda ne–inaa pia oodap'edaa pari teeit'ee ichia k'isia iru bi.

⁶Ïpemaarã Cristo k'aurepa, ma jara aupadade k'isiadak'ãri, k'awa p'ani mi Apolo ome ak'idaipia bi Tachi Ak'õre Ûraa p'ãdade jara bik'a, pãchi k'iradoopa ak'idai k'ãyaara. Mia mäga jara bi parãpa pedee audua pedenaadamerã pãchi jarateepari ãpite, pedee k'achia pedee p'ani misa awaraarã jarateepari ãpite. ⁷¿K'aipa parã bijima chïara ak'ipataarã? Tachi Ak'õrepata parã k'isia k'awaapipari mäik'aapa ne–inaa oo k'awaapipari. Pãchi k'iradoopa mäga oodak'aa. Mäga bita, ¿sãap'eda audua pedeeatama?

⁸Parã audua p'anadaik'araa bi. Mamïda mágá p'ani. Mi–it'ee parã p'arat'ara beerãk'ata p'ani, ne–inaa jõma iru p'anadairã; maarepida faltada–ee. Ma awara nãgaweda reyrãk'ata p'ani Cristo ome. Mapa iru jarateepataarãpa jarateeruta waa ùri k'iniadak'aa. ¡Taawa reyrãk'a p'anak'ajida, tai jida mäga p'anadait'ee auk'a! ⁹Mamïda mäga–e. Mi–it'ee Tachi Ak'õrepa tai, ichia jirit'eradaarã, ek'ariara papiji. Eperãarãpa awaraarã peedait'ee p'anik'a jõmaarã taide, mäga pik'a p'ani tai. Jõmaarãpa ak'i k'inia p'anapata jãgí eperãarã miapiruta. Mäga pik'a na p'ek'au eujãdepema jõmaarãpa tai chup'iria jõni ak'ipata, angeleerãpa paara. ¹⁰Tai k'ira k'awa–ee pik'a p'ani, Cristo–it'ee mimiapata perã. Jõdee parã k'isia k'awaara pik'a p'ani Cristode ijãa p'anida apata perã. Taipa mak'ïara k'awada–e p'ani Tachi Ak'õrepa k'isia iru bi, tai k'isiadoopa k'isia p'anadairã. Mamïda parãpa jõmaweda k'awa p'anida apata. Jõmaarãpa parã k'inia iru p'ani, t'ãri pia p'anadairã. Jõdee tai k'ira unuamaa iru p'ani, jõmaarã ek'ariara p'anadairã. ¹¹Taipa Tachi Ak'õre Ûraa jaratee p'anedak'ãriipa, mata at'ãri jarra oopata mäik'aapa opisias choopata; p'aru sore jipata. Ma awara ijãadak'aa beerãpa tai p'ua oopata. Te jida wëe p'ani, awara ãi jarateede nipapata perã. ¹²Tachi juadoopa mimiapata, ñida–ee. Awaraarãpa taimaa ik'achia jaradak'ãri, chõo jiridak'aa. Jip'a Tachi Ak'õremaa it'aa t'ipata ãchi pari. Tai jiridak'ãri miapidait'ee, taipa choopata. ¹³Tai ãpite pedee k'achia

jaradak'ári, áchimaa t'ári pia pedeepata. Mamída tai k'íra unuamaa iru p'anapata. Áchi-it'ee tai ne-inaa mik'iak'a p'ani. Mágá tai iru p'anajida. Mata at'ári mágá iru p'ani.

¹⁴Ma et'ewa jarada p'ã-e paji parã k'íra nejasiapiit'ee. Ūraait'eeta p'ãji ak'õrepa ichi warra k'inia iru bi ūraaparik'a. ¹⁵Mía mága jara bi mi-it'ee parã mi warrarãk'a p'anadairã. Jarateepataarã chok'araarãpa jarateedai Cristopa parãmaa oopi k'inia bi. Mamída mia naapiara jarateenaji Cristo parã pari piuda. Mágá irude ijãajida. Maperãpi mi parã ak'õrek'a bi. ¹⁶Maperã oodaipia bi mia oo bik'a.

¹⁷Mapa Timoteo pëiru parã k'aripanamerã. Iru mi warra k'iniak'a ichiaba, mia naapiara jarateeda perã Cristo iru pari piuda. Irua oopari Cristopa oopi bik'a. Mapa iru parãmaa pëiru, k'irãpapimerã mi sãga bapari Cristo jua ek'ari. Mía oopari Cristopa oopi bik'a mãik'aapa ijãapataarã para bee chaa jarateepari jõmaarãpa mága oodamerã.

¹⁸Parãdepema ũk'uru audua p'ani k'ísia p'anadairã mi waa parãmaa wã-e. Mamída mága-e. ¹⁹Ak'õrepa k'inia bi pirã, mak'iara taarã-e jãmaa wãit'ee. Pak'ári, mia k'awaait'ee mágá audua beerãpa jara jõni. Mamída ma k'ãyaara waapiara mia nãga k'awa k'inia bi. ¿Áchia oo p'anik'ã wa ooda-e p'ani Cristopa oopi bik'a? ²⁰Parãpa k'awadaipia bi Cristode ijãa p'anida apataarãpa oodaipia bi irua oopi bik'a. Mága oodak'ári, ak'ípipata pedeepapai ijãa k'iniada-e. Jíp'a p'ana k'inia p'anapata Cristo jua ek'ari. ²¹Mi parãmaa wãk'ári, ¿k'ãata k'inia p'anima; itriamerã wa pedee sia pedemerã?

K'ãata oodaipia bi pariatua p'ek'au oopataarã ome

5 ¹Írá mia jarait'ee mimaa nepiridap'edaa. Parã t'ãide abaapa ichi nawek'aa chi wërak'a iru bi. ¡Ijãadak'aa beerãpa pida mãgee k'achia oodak'aa! ²Mamída parã at'ári audua p'ani, k'ísia p'anadairã Tachi Ak'õre Jaurepa oopi bik'a oo p'ani. Audua p'anadai k'ãyaara, k'ísia p'ua p'anadaipia bi mágá k'achia oomaa bairã parã ijãapataarã t'ãide. Ma eperã pãchi ik'aawaapa áyaa pëidaipia bi. ³Mi parã ome ba-e pait'ee mída, mi k'ísia parã ome bait'ee. Tachi Waibia Jesupa mimaa k'awapiji k'ãata oodaipia bi ma eperã ome. ⁴Mapa mi k'ísia aupai bait'ee mída parã ome, irua auk'a mága k'awapiit'ee parãmaa chip'edaidak'ári irumaa it'aa t'ídait'ee. ⁵Jõma ijãapataarã see nãbak'ári, ma eperã pãchimãipa áyaa wãpíti, Satanapa iru k'ap'ia k'achia ooyaa bi miapimerã maa-e pirã piupimerã. Mágá Tachi Ak'õrepa iru jaure it'aa ateei Tachi Waibia Jesús cheit'ee ewate.

⁶Audua p'anadaik'araa bi ma k'achia oomaa bi misa parã t'ãide. Jõmaarãpa nãgí pedee k'awa p'ani: “Levadura ma-ãriipa pan masa jõmaweda waridaipari.” ⁷Tai judiorãpa Pascua fiesta oodai naaweda, levadura jõmaweda iru p'ani tai tede bat'ak'oopata, ma fiestade pan

levadura wēe k'odait'ee. Māga pik'a parāpa p'ek'au k'achia jōmaweda unu p'ani parā t'āide oo amaadaipia bi, k'achia wēe p'anadait'ee Tachi Ak'ōrepa k'inia bik'a. Wāara parā p'ek'au k'achia wēe p'ani Tachi Ak'ōre k'īrapite, Cristo piuda perā pāchia p'ek'au k'achia oopata wēpapiit'ee. Pascua fiestadepema oveja chak'ek'a bi piuji Tachi Ak'ōrepa tachi miapinaamerā tachia p'ek'au k'achia oopata k'aurepa. ⁸Cristo māgá piuda perā, p'anadáma irua oopi bik'a. Apidaapa k'achia oodaik'araa bi Cristode ijāadai naaweda oopatap'edaak'a. Ma k'āyaara k'īra jīp'a p'anapataadaipia bi māik'aapa wāarata jarapataadaipia bi.

⁹Mia naaweda k'art'a p'ādade jaraji k'ōp'āyo meraanaadamerā wēraarā maa–e pirā imik'īraarā pariatua p'ek'au ooyaa beerā ome. ¹⁰Māga jarak'āri, jara k'inia–e baji āyaa p'aneedamerā nāgee ijāadak'aa beerā ik'aawaapa: pariatua p'ek'au oopataarā; p'arat'a waapiara iru p'ana k'inia p'aniirā; nechiapataarā maa–e pirā awaraa ak'ōre waibia apatade ijāapataarā. Māgeerā ik'aawaapa āyaa p'aneedap'edaa paara, ichita uchiadait'ee paji na p'ek'au eujādeepa. ¹¹Nāgí p'ārupa mia jarait'ee k'āata jara k'inia baji apema k'art'ade. K'ōp'āyo meraanáati ijāapataarāda apata mīda, nāga oopataarā ome: pariatua p'ek'au ooyaa beerā; p'arat'a waapiara iru p'ana k'inia p'aniirā; awaraa ak'ōre waibia apatamaa it'aa t'īpataarā; awaraarā āpīte ik'achia jarapataarā; it'ua toyaa beerā maa–e pirā nechiapataarā ome. Māgeerāmaa p'asianáati māik'aapa pāchima chepináati. Nek'ode paara t'īudaik'araa bi māgeerā ome. ¹²⁻¹³Māga jara bi Tachi Ak'ōrepa tachi bi–e pada perā ijāadak'aa beerāpa oo p'ani ak'idamerā. Ichiata māirāpa oopatap'edaa ak'iit'ee māik'aapa āchi miapiit'ee. Mamīda tachia ak'idaipia bi awaraarāpa oo p'ani tachi ijāapataarā t'āide, ijāadak'aa beerāk'a p'anaruta pirā. Maperāpi parāpa chi k'achia ooyaa beerā āyaa wāpidaipia bi pāchi ik'aawaapa, Tachi Ak'ōre Ūraa p'ādade jara bik'a:

'Jēret'áati chi k'achia ooyaa beerā pāchi ik'aawaapa.'

(Dt 17.7)

Ijāapataarā nepirade p'anadak'āri

6 ¹Īrá mia jarait'ee k'āata oodaipia bi parā nepirade p'anadak'āri. Parādepema nepira iru bak'āri awaraa ijāapari ome, ijāadak'aa beerā charraarāmaa wāik'araa bi. Ma k'āyaara ijāapataarāmaa wāipia bi. ²¿Parāpa k'awada–e p'anik'ā tachi Cristo ome araa p'aniirāpa iru pari ak'idait'ee ijāadak'aa beerāpa ne–inaa oopatap'edaa jaradait'ee pia wa k'achia? Māga bīta, ¿sāap'eda p'oyaa ak'ida–ema ijāapataarā nepira mak'iara waibia–e bīta parā t'āide? ³¿K'awada–e p'anik'ā tachia ichiaba angeleerā ak'idait'ee? Māga pirā, jīrapema nepira pāchi pitapai ak'idai! ⁴Māgá parā awaraa ijāapataarā ome nepirade baaidak'āri, charraarā ijāadak'aa beerāmaa wādai k'āyaara, wādaipia bi charraarā ijāapataarāmaa. ⁵⁻⁶Nāgí jararupa parā k'īra nejasiapi k'inia bi. ¿Pia bik'ā

chõopik'a para bait'ee pãchi pitapai, ma awara mãgee charraarã k'irapite wãdait'ee? ¿Apida parãdepemapa ijãapataarã nepira p'oyaa ak'ida-ek'ã?

7 ¿Parã mágá chõo pik'a para bairã, k'achia oomaa p'ani! Ma k'ãyaara piara bak'aji awaraarãpa parã nepirade baaipidamerã. Maa-e pirã piara bak'aji awaraarãpa parã k'uradamerã. 8 Mamída mãga-e. ¿Parãpata nepira jiripata awaraarã ome mãik'aapa awaraarã k'urapata, parã ipemaarã mída Cristo k'aurepa!

9 ¿Parãpa k'awada-e p'anik'ã k'achia oopataarã wãda-e pait'ee Ak'õre eujãdee ichideerã ome? K'irak'aupai ijãadak'aa beerãk'a p'anadai, nãgeerã wãdak'aa perã Tachi Ak'õre eujãdee: prostitutaarã; it'aa t'ipataarã awaraa ak'õre waibia apatamaa; miak'ãi p'aniirã awaraarã ome k'ãipataarã; imik'iraarã awaraa imik'iraarã ome k'ãipataarã, imik'ira wëra ome k'ãi bik'a; 10 nechiapataarã; p'arat'a waapiara iru p'ana k'inia p'aniirã; it'ua toyaa beerã; ik'achia jarapataarã awaraarã ãpíte maa-e pirã k'urayaa beerã awaraarã net'aa atadait'ee. 11 Ijãadai naaweda, parã ùk'uru mágá p'anapachida. Mamída Tachi Waibia Jesucristode ijãadak'ari, iru piuda k'aurepa Tachi Ak'õrepa wëpapiji parãpa p'ek'au k'achia oopatap'edaa. Ichiaba parã awara biji ichi-it'ee, ichi Jaure pëik'ari parã ome bapariimerã mãik'aapa oopimerã Cristopa oopi k'inia bik'a. Mãga ooji parã ichi k'irapite p'ek'au k'achia wëe p'anadamerã.

Tachi Ak'õrepa ijãapataarã k'ap'ia awara bida ichi-it'ee

12 Eperãarãpa jarapata: “Ne-inaa jõma ooi michia oo k'inia bik'a.” Mamída ma ne-inaa k'achia bi pirã, maarepida mi k'aripa-e pait'ee. Ne-inaa jõma ooi. Mamída mãga oo k'inia bi k'aurepa mia oo-e pirã Cristopa oopi bik'a, ma ne-inaa jua ek'ari bapariit'ee, Cristo jua ek'ari bai k'ãyaara. 13 Ichiaba jarapata: “Chik'o iru p'ani k'odait'ee mãik'aapa bi iru p'ani ma chik'o aide banamerã.” Mamída na ewari Tachi Ak'õrepa ma omee weda jõpiit'ee. Wãara Tachi Ak'õrepa bi ooji chik'o aide banamerã. Mamída tachi k'ap'ia oo-e paji pariatua p'ek'au oodamerã. Jip'a ooji ichi Jaure ma k'ap'iaide bapariimerã mãik'aapa tachia oodamerã Cristopa oopi bik'a. 14 Maperãpi Tachi Ak'õrepa tachi k'ap'ia jõpi-e pait'ee. Ma k'ãyaara ichi ewari waibia ewate tachi k'ap'ia chok'ai p'irabaipiit'ee Jesucristo k'ap'ia p'irabaipidak'a. Mágá ooi jõmaarã k'ãyaara waibia bapari perã.

15 ¿Parãpa k'awada-e p'anik'ã tachi ijãapataarã araa p'aneepata Cristo ome irude ijãadak'ari? Tachi Ak'õrepa tachi k'ap'ia ooji ichi Jaure aide bapariimerã. Mapa tachi k'ap'ia araa p'anapidaik'araa bi prostitutaarã ome. 16 ¿K'awada-e p'anik'ã eperã araa paru pirã prostituta ome, mágá wëra ome eperã apai pik'a paru? Mãga k'awa p'ani Tachi Ak'õre Úraa p'ãdade jara bairã:

‘Mágá eperã omee weda eperã apai pik'a p'aneedit'ee.’ (Gn 2.24)

17 Jõdee eperã Cristode ijãak'ari, araa beepari iru ome mãik'aapa ma eperã jaure apai pik'a beepari Tachi Ak'õre Jaure ome. T'ari a-ba p'anapata.

¹⁸Maperãpi p'ek'au oonáati awaraarã ome. Eperãpa awaraa p'ek'au k'achia ook'ãri, ichi k'ap'ia araa bapik'aa awaraa eperã k'ap'ia ome. Mamída awaraa ome p'ek'au ook'ãri, ichi k'ap'ia k'achiade baaipipari, ichi k'ap'ia araa bi Cristo ome bipari perã awaraa eperã jua ek'ari, Cristo jua ek'ari bii k'ãyaara. ¹⁹¿K'awada–e p'anik'ã Cristode ijãadak'ãriipa Ak'õre Jaure tachi k'ap'iade bapari, Tachi Ak'õre ichi te waibiade baparik'a? Mapa Tachi Ak'õreta tachi k'ap'ia chipari. ²⁰Iruata tachi neto pik'a ataji ichi Warra apai iru bada pëik'ãri piumerã tachi pari. Mapa parã ichideerã perã, k'achia oo amáati. Mãgá ooruta pirã, ak'ipidai wãara oo k'inia p'ani irua oopi bik'a.

Ûraa miak'ãidait'ee k'isia p'aniirã–it'ee

7 ¹Írã mia p'anaut'ee parãpa k'art'a p'ãdap'edaade iidi pëidap'edaa. Naapiara iidijida chisãgita pipiara bi ijãapari–it'ee, miak'ãiit'ee maa–e pirã tuu bait'ee. Mi–it'ee piara bi tuu bait'ee. ²Mamída imik'ïra tuu bak'ãri, wëraarã ome pariatua p'ek'au oo nipai. Maperã imik'ïrapa ichi wëra iru baipia bi; wërapa pida ichi imik'ïra iru baipia bi. ³Imik'ïrapa ichi k'ap'ia wãak'aik'araa bi chi wëramaa; wërapa pida ichiaba ichi k'ap'ia wãak'aik'araa bi chi imik'ïramaa. ⁴Mãgá p'anapataadaipia bi wëra k'ap'ia chi imik'ïra–it'ee perã mãik'aapa imik'ïra k'ap'ia chi wëra–it'ee perã. ⁵Jip'a Tachi Ak'õremaa it'aa t'ï k'iniapa pedeeteeruta pirã, ma ewate araa k'ãida–e pait'ee. Mãga p'anadak'ãri, ãra k'ap'ia wãak'adai. Mamída ai t'ëepai waya k'ãidaipia bi, Satanapa k'achia oopiamaapa awaraa ome, p'oyaa chooda–e p'anadairã. ⁶Mia mãga k'isia bi. Pãchia jiridaipia bi Tachi Ak'õrepa oopi k'inia bi parãmaa. ⁷Mi–it'ee pipiara bak'aji jômaweda mik'a p'anadamerã. Mamída k'awa bi Tachi Ak'õrepa k'aripai ijãapari chaa k'awaamerã miak'ãipia bi wa mãga–e.

⁸Mia ùraait'ee imik'ïra tuu beerãmaa, wëra tuu beerãmaa mãik'aapa p'ëtrãa tuu beerãmaa mik'a p'anadamerã. ⁹Mamída miak'ãi k'inia p'ani pirã, miak'ãiti, p'ek'au oo k'inia p'anadai k'ãyaara.

¹⁰⁻¹¹Ichiaba Tachi Waibiapa jarapi bik'a mia jara bi: wërapa ichi imik'ïra amaaik'araa bi. Auk'a imik'ïrapa ichi wëra amaaik'araa bi. Mamída mãga ooruta pirã, miak'ãidaik'araa bi awaraarã ome. Ma k'ãyaara waya araa padaipia bi ãchi naaweda p'anadap'edaak'a.

¹²Írã mia ùraait'ee ijãapataarã miak'ãi p'anadap'edaa ijãadak'aa beerã ome, Cristode ijãadai naaweda. Cristopa jaratee–e paji k'ãata oodaipia bi. Mamída mia nãga ùraait'ee. Eperã Cristode ijãaparipa wëra ijãak'aa bi iru bi pirã, amaaik'araa bi, chi wëra iru ome ba k'inia bi pirã. ¹³Ichiaba wërapa imik'ïra ijãak'aa bi iru bi pirã, amaaik'araa bi, chi imik'ïrapa iru ome ba k'inia bi pirã. ¹⁴Ijãapari araa bak'ãri ijãak'aa bi ome, eperã apai pik'a p'ani. Mãga bita, Tachi Ak'õrepa chi ijãak'aa bi pia

ak'ipari ma ijāapari k'aurepa. Māgá ichiaba Ak'ōrepa āchi warrarā pia ak'ipari ma ijāapari k'aurepa. ¹⁵Mamīda ma ijāak'aa bīpa chi Cristode ijāapari amaa k'inia bi pirā, māga oonaapāde adaik'araa bi, iru k'īra unuamaa iru bapiamaapa. Tachi Ak'ōrepa k'inia bi ichideerā k'āiwee p'anapataadamerā. ¹⁶Jōdee ma ijāaparipa chi ijāak'aa bi pēi k'inia—e bi pirā, choopia bi. Māga ooru pirā, ai t'ēepai iru k'aurepa māgipa Cristode ijāai. Parā ijāapataarāpa k'awada—e p'ani chisāgī ijāadak'aa beerāpa ijāadai parāpa k'aripapata perā. Tachi Ak'ōrepapai k'awa bi.

Sāga p'anapataadaipia bi ijāada t'ēepai

¹⁷Írá mia nāga ūraait'ee. Parāpa jiridak'āri Cristopa oopi k'inia bi parāmaa, p'anadaipia bi parā p'anadap'edaak'a Tachi Ak'ōrepa ijāapik'āri. Mia māga jarateepari ijāapataarā jōmaarāmaa. ¹⁸Tachi Ak'ōrepa Cristode ijāapiru pirā imik'īra tauchaa iru bi ichi k'ap'iade, ma eperāpa meraik'araa bi ma tauchaa iru bi. Jōdee ichi k'ap'iade tauchaa wēe bi pirā ijāak'āri, tauchaa bīpiik'araa bi. ¹⁹Mia māga jara bi Tachi Ak'ōre—it'ee p'ua—e bairā eperāpa tauchaa iru bi wa wēe bi. Jīp'a Ak'ōrepa k'inia bi tachia oodamerā ichia jara bik'a. ²⁰Maperā awara baik'araa bi pīchi naaweda bada k'āyaara, Tachi Ak'ōrepa ijāapik'āri. ²¹Esclavo paji pirā ijāa beek'āri, k'īsianāaji pī eperā jua ek'ari bi perā. Jōdee chiparipa pī pēi k'inia bi pirā, k'āiwee uch'faji. ²²Esclavopa Cristode ijāak'āri, at'āri chipari iru bi mīda, esclavo—ee pik'a beepari, Cristopa iru uch'ia atada perā p'ek'au k'achia jua ek'ariipa. Jōdee esclavo—ee bīpa Cristode ijāak'āri, Cristo esclavok'a beepari, irua oopi bik'a oopari perā. ²³Cristopa parā neto pik'a ataji ichi waa kurusode bat'ak'āri. Māgá ichi piuji parāpa p'ek'au k'achia oopata wēpapiit'ee māik'aapa parā o k'achiadeepa k'aripa atait'ee atuanaadamerā. Maperāpi parā ichideerā. Maperā óoti irua oopi bik'a, oodai k'āyaara eperāarāpa oopi k'inia p'anik'a. ²⁴Mapa ipemaarā, mia et'ewa jaradak'a p'anadaipia bi pāchi ijāadai naaweda p'anadap'edaak'a.

Tuu beerāpa iidi pēidap'edaa p'anauada

²⁵Írá mia p'anaut'ee tuu beerāpa iidi pēidap'edaa. Mia p'oyaa jara—e Cristopa jarapida, irua nāgī jaratee—e pada perā. Mamīda Tachi Ak'ōrepa mī chupīria k'awaap'eda, Cristode ijāapiji māik'aapa iru ūraa mīmaa jarateepiji. Maperā parāpa na ūraa ūridaipia bi. ²⁶Írapema ijāapataarā miapi iru p'anadairā, mī—it'ee pipiara bi tuu bait'ee. ²⁷Wēra iru bi pirā, yiarāa iru baik'araa bi. Jōdee wēe bi pirā, jīriik'araa bi. ²⁸Mamīda miak'āiru pirā, p'ek'au k'achia oo—e bi Tachi Ak'ōre k'īrapite. Ichiaba wēra tuu bīpa imik'īra ataru pirā, p'ek'au k'achia oo—e bi. Mamīda chi miak'āirutaarā audú miadait'ee na p'ek'au eujāde p'ani misa. Mapa mia jara bi pipiara bi tuu bait'ee.

²⁹Īpemaarā, mia māga jara bi k'isia bairā taarā—e Cristo cheit'ee. Māga ni p'anide miak'āi p'aniirā p'anadaipia bi tuu beerāk'a; chi Cristopa oopi bik'a oo p'aniirāk'a. ³⁰Ma awara t'āri p'ua p'aniirā maa—e pirā o—ia p'aniirāpa k'isiadaipia bi Cristopa āchima oopi k'inia bi, āchi k'isiade iru p'ani k'āyaara. Ichiaba ne—inaa neto atapataarāpa k'irāpadaipia bi āchia net'aa atada ateeda—e pait'ee Tachi Ak'ōre eujādee. ³¹Ma awara ne—inaa netopataarāpa k'irāpadaipia bi āchia p'arat'a jitadap'edaa ne—inaa neto pēidap'edaa pari it'aa ateeda—e pait'ee. Ma p'arat'a māik'aapa net'aa jiridai k'āyaara, Cristopa oopi k'inia bi jiridaipia bi, na p'ek'au eujā māik'aapa jōma aide nībi Tachi Ak'ōrepa jōpiit'ee perā.

³²Mia nāga ūraait'ee k'isia jōnanaadamerā. Īmik'īra tuu bipa jiripari ooit'ee Cristopa oopi k'inia bik'a. ³³Mamīda miak'āi bi k'isia nībapari na p'ek'au eujādepema net'aade māik'aapa chi wēra o—ia bapiit'ee. ³⁴Māgī ĩmik'īrapa auk'a oo k'inia bairā Cristopa oopi k'inia bi māik'aapa chi wērapa oopi k'inia bi, audú k'isia nībi chi tuu bi k'āyaara. Ichiaba wēra ĩmik'īra wēe bipa k'awa k'inia bi Tachi Ak'ōrepa k'isia iru bi ooit'ee ichi ome. Mamīda chi miak'āi bipa k'awa k'inia bi chi ĩmik'īrapa oopi k'inia bi, māga ooit'ee chi k'ima o—ia bamerā.

³⁵Māga jaraji parā k'aripait'ee pia p'anapataadamerā māik'aapa pāchi t'āriapa Cristopa oopi bik'a oodamerā.

³⁶Īmik'īra tuu bipa pedeeru pirā miak'āiit'ee māik'aapa k'ap'iapa choo—e bi pirā wēra wēe bait'ee maa—e pirā ma wēra pedeeteeda t'āri p'uapi k'inia—e bi pirā, miak'āipia bi. Māga ooru pirā, p'ek'au k'achia oo—e bi. ³⁷Mamīda ichi t'āride miak'āi k'inia—e bi pirā māgī wēra ome māik'aapa k'ap'iapa choo bi pirā, miak'āik'araa bi. ³⁸Māpai ma miak'āi k'inia bipa pia k'isia bi. Mamīda ma miak'āi k'inia—e bipa pipiara k'isia bi.

³⁹Tachi Ak'ōre Ūraa p'ādade jara bi wēra miak'āi bipa awaraa jiriik'araa bi, ichi ĩmik'īra chok'ai bi misa. Jōdee ichi k'ima piuk'āri, pia bi waya jirimerā, mamīda Cristode ijāpari jiriipia bi. ⁴⁰Mamīda mia k'isia bi ma p'ētrāa t'āri o—iara bai miak'āi—ee beeru pirā. Māga k'isia bi mia. Mīmaa Tachi Ak'ōre Jaurepa ichiaba k'isiapipari.

Nechiara ata bidap'edaa ne—inaa juapa ooda k'īrapite

8 ¹Īrā mia p'anaut'ee parāpa iidi pēidap'edaa k'awaadait'ee k'odaipia bi wa k'odaik'araa bi nechiera ata bidap'edaa primisiak'a awaraa ak'ōre waibia apata k'īrapite. Mamīda māgī p'anau naaweda, k'inia bi parāpa k'irāpadamerā audua p'anadaik'araa bi k'awa p'anadairā ne—inaa ooda ai k'īrapite it'aa t'īpata Tachi Ak'ōre—e. Audua p'anadai k'āyaara, tachia k'inia iru p'anadaipia bi māgee net'aade at'āri ijāa p'aniirā, Tachi Ak'ōre pia k'awada—e p'anadairā. Māgā oo p'ani pirā, āchi k'aripadai Tachi Ak'ōre pipiara k'awaadamerā. ²Eperāpa k'isia bi pirā ichiata

ne–inaa k'awa bi, wāara mak'iara k'awa–e bi Tachi Ak'ōrepa ichimaa k'awapi k'inia bi. ³Mamīda eperāpa Tachi Ak'ōre k'inia iru bi pirā, Tachi Ak'ōrepa k'awa bi ma eperā wāara irude ijāapari.

⁴Māgara ḡk'odaipia bik'ā wa k'odaik'araa bi nechiera ata bidap'edaa ne–inaa ak'ōre waibia apata k'īrapite? Tachi ijāapataarāpa pia k'awa p'ani māgee ne–inaa juapa ooda Tachi Ak'ōre–e, ai k'īrapite eperāarā it'aa t'ī p'ani mīda, āchi ak'ōre waibia jīak'aapa. K'awa p'ani māgee ne–inaa Tachi Ak'ōre–e, iru apai perā. ⁵Ijāadak'aa beerāpa ijāapata atanede maa–e pirā ak'ōrejīrude maa–e pirā awaraa ne–inaade, na p'ek'au eujādepema wa pajādepema, āchi ak'ōre waibiarā jīak'aapa. (Māga pada paara, “ak'ōre waibiarā” chok'ara paraak'aji.) ⁶Mamīda tachi ijāapataarā–it'ee Tachi Ak'ōreta Ak'ōre Waibia. Ijāapata irua ne–inaa jōmaweda ooji, eperāarā paara. Ma jōmaweda oopiji ichi Warra Jesucristomaa, tachia irude ijāadamerā māik'aapa irua oopi bik'a oodamerā.

K'īrak'aupai ne–inaa k'achia oopidai ewaa ijāa p'aniirāmaa

⁷Tachia k'awa p'ani ne–inaa ai k'īrapite it'aa t'īpata Tachi Ak'ōre–e. Mamīda awaraarāpa waide pia k'awada–e p'ani. Ewaa ijāa p'aniirāpa māgee ne–inaa at'āri iru p'ani āchi naawedapema iru p'anapatap'edaa ak'ōre waibia k'a. Maperā āchidepemapa k'oru pirā nechiera awaraarāpa bidap'edaa māgee ne–inaa k'īrapite, māgī k'isia p'uadarii, ma nechiera k'orupa māgī ak'ōre waibia apata at'āri waawee bai jīak'aapa. Ma awara k'isia p'ua bai waide k'awa–e bairā Cristode ijāa bide pia wa k'achia k'oit'ee māgee nechiera. ⁸Parā, chi k'awa beerāpa māgee ne–inaa Tachi Ak'ōre–e, k'awa p'ani Tachi Ak'ōrepa ma nechiera k'o beerā pipiara beerāk'a ak'i–e pait'ee. Ichiaba ma nechiera k'oamaa beerā ek'ariara beerāk'a ak'i–e pait'ee. Tachi Ak'ōrepa tachi ijāapataarā jōmaweda auk'a ichideerāk'a ak'ipari. ⁹Mamīda, māga k'awa p'anide, k'īrak'aupai k'isia p'uapidai maa–e pirā ne–inaa k'achia oopidai chi māga waide pia k'awada–e p'aniirāmaa. ¹⁰K'īsīati nāgide. Chi māga pia k'awa–e bīpa parā unuru pirā māgee ne–inaa bīmāi nek'omaa p'ani, auk'a k'o k'iniadarii. Māpai k'oru pirā, k'achiade baai, k'isia bairā ne–inaa k'achia oomaa bi. ¹¹Māgā parāpa ak'īpi k'inia p'anadairā k'awa p'ani māgee ne–inaa Tachi Ak'ōre–e, chi waide māga pia k'awa–e bi k'achiade baaipidai. K'īrak'aupai pāchi ipemamaa ne–inaa k'achia oopidai, Cristo ichiaba piuda perā iru k'aripait'ee. ¹²Māgā pāchi ipemaarāmaa ne–inaa k'achia oopidak'āri, k'achia oomaa p'ani Cristo k'īrapite. ¹³Maperā mi ipema k'achiade baairu pirā ne–inaa k'oparii k'aurepa, māgara mia waa nechiera k'o–e pait'ee. Ne–inaa k'achia oopi k'inia–e bi michi ipemaarāmaa mia nechiera k'o bi k'aurepa.

Pablo pedee ūripataarāpa iru k'aripadaipia bi

9 ¹Ne–inaa jōmaweda ooi mīchia oo k'inia bik'a. Mamīda jīp'a oo k'inia bi Cristopa oopi bik'a, irua mi ichi ūraa jarateede pēida perā.

Awaraa Cristopa jirit'eradaarāk'a, mia ichiaba Tachi Waibia Jesús unuji michi taupa. Parāpa pida Cristode ijāapata, mia parāmaa jarateenada perā irua ooda parā k'aripait'ee. ² Ūk'uruurāpa ijāada–e p'ani mi Cristopa pēida. Māirāpa ak'i k'inia p'ani mia oopata māik'aapa jarateepata mi imiateedait'ee. Mamīda parā t'āidepema mia jarateeda ijāadap'edaarāpa k'awa p'ani Cristopa mi pēiji, mi k'aurepa Cristo ome araa p'anapata perā. ³ Chi ijāada–e p'aniirāpa k'awa k'inia p'ani pirā Cristopa mi pēida wa māga–e, parā p'anapata ak'idaipia bi.

⁴ Cristopa mi wāara pēida perā, irude ijāapataarāpa chik'o māik'aapa pania mimaa teedaipia bi. ¿Wāara–ek'ā? ⁵ Awaraa Cristopa pēida eperāarā, Pedropa māik'aapa Cristo ipemaarāpa āchi wēraarā Cristode ijāa p'ani atEEPATA awara āyaa wādak'āri. Māga wādak'āri, ijāapataarāpa āra k'aripapata. ¿Parāpa auk'a mi ome māgá ook'ajida–ek'ā, wēra iru bada paara? ⁶ ¿Pia bik'ā mi Bernabé ome mimiadamerā chik'o iru p'anadait'ee? ¿Pia–e bak'ajik'ā taipa jarateepata ūrirutaarāpa k'aripadamerā?

⁷ K'īsati! Eperā soldao pak'āri, chik'o māik'aapa awaraa net'aa irumaa pari teepata. Ichiaba eperāpa ne–uuda chauk'āri, ichia madepema pari k'opari. Ichiaba ne–animalaarā wariparipa k'opari ichia wari bidepema. Māgapi p'ani tai jida ichiaba. ⁸ Michi k'īsidoopa māga jara–e bi. Tachi Ak'ōre Ūraa Moisemaa p'āpidade ichiaba māga jara bi:

⁹ 'P'ak'a it'ai jīnāati trigo t'iamaa bak'āri. Ita–aria k'opīti.' (Dt 25.4)
Tachi Ak'ōrepa māga jarak'āri, p'ak'a aupai ichi k'īsidade iru ba–e paji. ¹⁰ Jīp'a tai, ichi mimia oopataarāta, ichi k'īsidade iru baji, k'inia bairā awaraa ijāapataarāpa tai k'aripadamerā ne–inaa wēe p'anadak'āri. Ne–uupataarāpa ne–uu chauda p'epataarā ome auk'a jita k'inia p'ani āchi mimia pari. ¹¹ Māga pik'a taipa jarateedak'āri Cristopa ooda parā k'aripait'ee, auk'a jita k'inia p'ani chik'o māik'aapa pania parā juadepema. ¹² Awaraarāmaa tee p'ani pirā, ¿ichiaba taimaa teedaipia bi–ek'ā?

Mamīda tachi juadoopa mimiapata, parāmaa ne–inaa iidida–e pait'ee. Māga oopata parāpa k'īsianaadamerā taipa jarateepata ne–inaa falta p'ani atadait'ee. ¹³ Parāpa k'awa p'ani Tachi Ak'ōre te waibiadepema altarmāi mimiapataarāpa māik'aapa ne–animalaarā paapataarāpa k'opata eperāarāpa aneepatadepema paapidait'ee Tachi Ak'ōre–it'ee. ¹⁴ Māga pik'a Cristopa jaraji ichi ūraa jarateepataarāpa ne–inaa jitadaipia bi awaraa ijāapataarā juadeepa.

¹⁵ Mamīda mia parāmaa maarepida iidi–e paji māik'aapa at'āri iidi–e bi. Ma k'āyaara piu baibeei jarrapa parāmaa k'īsipi k'āyaara mia Cristo mimia oo bi ne–inaa atait'ee.

¹⁶ Mamīda mi pipiara bi–e apemaarā pēida eperāarā k'āyaara, ne–iidi–e bairā. Cristopata mi pēiji ichi ūraa jarateede. Maperāpi mia

jarateepari. Waawee bak'aji, jaratee–e pada paara irua oopi bik'a, irua mi miapii j̄iak'aapa. ¹⁷Ma awara michi k'inia jarateeda paara, ne–inaa ata k'inia bak'aji na mimia pari. Mam̄ida m̄āga–e. Mia na mimia oopari Cristopa oopi bik'a. Mapa maarepida mimaa teeda–e p'ani m̄ida, j̄ip'a jarateeit'ee, ma–it'eeta Cristopa mi jirit'erada per̄a. ¹⁸Mia maarepida par̄amaa teepi–e pait'ee. N̄āgapai mia k'inia bi. Michi t'āriipa na mimia oo k'inia bi Cristopa oopi bik'a.

¹⁹Mia j̄omaweda ooi Cristopa oopi bik'a, eper̄ar̄a esclavo–e per̄a. Mam̄ida mi eper̄ar̄a esclavok'a padaipari n̄āga per̄a. Ba k'inia bi mia jaratee bi ūri p'aniir̄a p'anapatak'a, ma jaratee bi ūridak'āri, Cristode ij̄aadamer̄a. ²⁰Judior̄a t'āide jaratee nipak'āri, ārapa oopatak'a oopari. Ichiaba Moisepa p'ādade jara bik'a oopari. Cristode ij̄aadak'āriipa mi m̄āgí ūraa p'āda jua ek'ari bi–e m̄ida, m̄āga oopari ārapa irude ij̄aadamer̄a. ²¹Jōdee judio–eer̄a t'āide jaratee nipak'āri, oopari ārapa oopatak'a. Mam̄ida Cristopa oopi k'inia bik'a oopari, ārapa ichiaba Cristode ij̄aadamer̄a. ²²Ma awara Cristode pia ij̄aada–e p'aniir̄a jarateek'āri, jarateek'aa k'isia k'awaa bipa jarateeparik'a. Ārapa k'isia p'anik'a mia k'isiapari m̄aik'aapa j̄ip'a jarateepari, ārapa Tachi Ak'ōre pipiara k'awaadamer̄a m̄aik'aapa waapiara Cristode ij̄aadamer̄a. Michi w̄arumaa m̄āga oo bi, k'inia bair̄a mia jaratee bi ūrirutaar̄apa Cristode ij̄aadamer̄a. ²³Ma k'aurepa ij̄āa p'ani pir̄a, mi ome auk'a k'awaadai j̄omaweda Tachi Ak'ōrepa k'isia iru bi ichideer̄a–it'ee.

²⁴Par̄apa k'awa p'ani p'irapataar̄a p'iradak'āri, j̄omaweda isapai p'irapata, ata k'inia p'anadair̄a ne–inaa teepata chi naapiara panarumaa. M̄āga pik'a par̄a p'anadaipia bi, ne–inaa oomaa p'anide Cristopa oopi bik'a. M̄āgā atadai Tachi Ak'ōrepa k'isia iru bi teeit'ee Cristode ij̄aapataar̄amaa. ²⁵Eper̄a p'irait'ee pak'āri, ichi k'ap'ia pia ak'ipari. Ewari chaa p'irapari iyapaa–e pait'ee apemaar̄a ome p'irak'āri. P'irapataar̄a j̄omaar̄apa m̄āgā oopata, naapiara pana k'inia p'anadair̄a atadait'ee poro j̄ira k'irudee ooda; taar̄a chook'aa bita. M̄āga pik'a tachia oo k'inia p'ani oo amaapata m̄aik'aapa Cristopa oopi bik'a oopata atadait'ee it'aripema poro j̄ira; Tachi Ak'ōrepa k'isia iru bi teeit'ee ichideer̄amaa; m̄āgí ne–inaa j̄ok'aa bi. ²⁶Mapa mia ook'aa p'irapari pariatua p'iraparik'a maa–e pir̄a boxeo ch̄ooperik'a n̄au aupai s̄ik'āri. J̄ip'a t'āriipa mia oopari Cristopa oopi bik'a. ²⁷Michi p'ek'au k'achia ooyaa bi k'ap'ia ne–inaa oo k'inia bak'āri, m̄āga oopik'aa n̄āga per̄a. Michi k'iniapai ooru pir̄a, k'ira nejasia bait'ee it'ari panak'āri Tachi Ak'ōre k'irapite. Ma awara m̄āga ooru pir̄a, Cristopa ne–inaa k'isia iru bi teeit'ee ichideer̄amaa mimaa tee–e pait'ee, mia awaraar̄amaa jaratee bajī m̄ida na p'ek'au euj̄āde bi misa.

Ūraa it'aa t'inaadamer̄a awaraa ak'ōre waibia apatamaa

10 ¹Īrá ĩpemaar̄a, k'ir̄āpapiit'ee s̄āga chonaar̄aweda Tachi Ak'ōrepa tachi judior̄a chonaar̄a ak'ipachi. J̄āraradeepa āra j̄omaweda

ak'i bapachi Egiptodeepa uchiadak'ári. Ma awara ára jómaweda sīapiji Mar Rojo esajīak'a p'oodade. ²Ma jīararadeepa Tachi Ak'órepa o jara wāji āramaa Moisés k'ap'ia pari māik'aapa iru k'ap'ia pari ára k'aripaji Mar Rojo sīadamerā. Māgá Tachi Ak'órepa ára jómaweda Moisés jua ek'ari biji, tachi ijāapataarā Cristo jua ek'ari bīparik'a ijāadap'eda, poro choopidak'ári. ³Ma awara Tachi Ak'órepa *maná* pēida it'ariipa jōmaarāmaa k'opipachi ⁴māik'aapa topiji pania māudeepa uchiapida. Cristo māgí máuk'ata baji, ichideepa uchiapachi perā Tachi Ak'óre Jaure k'aripade ára wārutamaa. ⁵Tachi Ak'órepa ma jōma oopachi mīda ára k'aripait'ee, ooda–e p'anapachida irua oopi k'inia badak'a. Mapa Tachi Ak'órepa perá jómaweda piupiji, eujā pania wēe bide wāyaarutade.

⁶Tachia māgí chonaarāpa oodap'edaade k'isiadak'ári, k'awaadaipia bi ārapa oodap'edaa k'achia baji Tachi Ak'óre k'irapite. Mapa k'irak'aupai māgá oodai ārapa oodap'edaak'a. ¡Oonaadāma tachia ne–inaa k'achia k'ira t'ādo o k'inia p'anik'a! ⁷It'aa t'ínáati ne–inaa juapa ooda k'irapite, chonaarā ūk'uruurāpa oopatap'edaak'a. Tachi Ak'óre Ūraa p'ādade jara bi:

‘Eperāarāpa fiesta oojida ne–inaa juapa ooda k'irapite, ai k'irapite it'aa t'ipata. Ma–it'ee nek'ojida, ne–inaa tojida, maap'eda pēirajida.’

(Ex 32.6)

⁸Ichiaba pariatua p'ek'au oonáati, ma k'aurepa ewari abaade Tachi Ak'órepa āradepemaarā veintitrés mil k'iniipida perā. ⁹Ichiaba Tachi Ak'óre k'irapináati āradepemaarāpa oodap'edaak'a, jaradak'ári Tachi Ak'órepa ára p'oyaa pia ak'i–e paji. Maperā Tachi Ak'órepa taamaarā pēiji k'aak'oodamerā. Mapa chok'ara piujida. ¹⁰Ichiaba Tachi Ak'óre āpite ik'achia pedeenáati āradepemaarāpa oodap'edaak'a. Māga oodap'edaa perā Tachi Ak'órepa it'ariipa ichi ángel pēiji; māgipa chok'ara peemerā.

¹¹Tachi chonaarā māgá p'anadap'edaa perā, pia ak'idaipia bi ārapa oodap'edaa, Tachi Ak'órepa māgí oodap'edaa p'āpida perā ichi ūraa p'ādade, tachia k'awaadamerā māik'aapa auk'a oonaadamerā, ni p'ani misa na p'ek'au eujā jōru. ¹²Māpai parā t'āidepemapa k'isia bi pirā ichiata oopari Cristopa oopi bik'a, k'irak'aupai ne–inaa k'achia ooi. ¹³Edaare tachi t'āridepai k'isia p'aneepata ne–inaa k'achia oodait'ee. Ma awara netuarapa k'isiapipari ne–inaa k'achia oodamerā. Māga p'asapari jōmaarā ome. Mamīda māga p'asak'ári parā ome, ijāadaipia bi Tachi Ak'órepa k'aripait'ee choodamerā, k'achia ooda–ee.

¹⁴Maperā, ipemaarā k'iniarā, parāpa k'isiaruta pirā wādait'ee awaraa ak'óre waibia apata k'irapite it'aa t'ide, ¡māgá oonáati! ¹⁵Parā k'isia k'awaa p'ani. Mapa k'isiadaipia bi mia jara bide k'awaadait'ee seewa maa–e pirā wāra. ¹⁶¡K'isíati! ¡K'āata jara k'inia bīma tachia oopata, vino todak'ári māik'aapa pan k'odak'ári k'irāpadait'ee Jesucristo piuda tachi pari? Todai naaweda māik'aapa k'odai naaweda, it'aa t'ipata Tachi

Ak'õremaa jaradait'ee iru t'ãri pia bi Cristo tachi pari piupida perã. Ma vino todak'ãri, k'irãpa p'ani Cristo waa bat'ada k'aurepa, tachi araa p'anapata iru ome. Ichiaba ma pan k'odak'ãri, k'irãpa p'ani Cristo k'ap'ia piuda k'aurepa tachi araa p'anapata apemaarã Cristode ijãapataarã ome. ¹⁷Tachi chok'ara p'ani mïda, mãgí pan k'odak'ãri, eperã apai pik'a p'anapata Cristo piuda k'aurepa, iru ome tachi chaachaa araa p'anapata perã.

¹⁸ ¡K'isíati! Israel pidaarãpa ne–animalaarã ateedak'ãri paapidait'ee Tachi Ak'õre altarmã, ak'ipipata irude ijãa p'ani. Ma awara mãgí ne–animalaarãdepema k'odak'ãri, ak'ipipata ãchi Tachi Ak'õredeerã. ¹⁹Ma jaradapa mia jara k'inia–e bi ne–inaa ai k'irapite it'aa t'ipata Tachi Ak'õrek'a bi. Ichiaba jara k'inia–e bi nechiara ata bidap'edaa ma k'irapite pipiara bi awaraa nechiara k'ãyaara. ²⁰Ma k'ãyaara jara k'inia bi Tachi Ak'õrede ijãadak'aa beerãpa nechiara k'odai naaweda, biruta pirã ne–inaa juapa ooda k'irapite, ak'ipipata mãgide ijãa p'ani, tachia Cristode ijãapatak'a. Mamida mãga oodak'ãri, wãara ooda–e ãchi ak'õre waibia apata–it'ee. Jip'a oopata netuaraarã–it'ee, mãgee ne–inaa juapa ooda k'irapite it'aa t'ipata netuarade perã. Maperã parã wãnáati mãgí ne–inaa ai k'irapite it'aa t'ipatamaa k'odait'ee nechiara ata bidap'edaa ma ne–inaa k'irapite. Mãga ooruta pirã, ak'ipi p'ani araa p'ana k'inia p'ani netuaraarã ome. ¡Mia mãga k'inia–e bi! ²¹ ¿Parã araa p'anadaipia bik'ã netuara ome? ¡Mãgá oodaik'araa bi, Cristo waa bat'ada k'aurepa iru ome araa p'anapata perã! ¿Netuara eere p'aniirã ome k'odaipia bik'ã nechiara netuaramaa teeda? Mãga oodaik'araa bi, Cristode ijãapataarã ome araa p'anapata perã iru piuda k'aurepa.

²² ¡Tachi Ak'õre k'irãupináati omee weda oo k'inia p'anipa! ¿K'isia p'anik'ã Tachi Ak'õre p'oyaadai, irua parã miapinaamerã?

Apemaarã ijãapataarã ijãa amaapidaik'araa bi

²³ “Michia oo k'iniata ooit'eeda” apata. Mamïda ma ne–inaa k'achia bi pirã, tachia apida k'aripada–e pait'ee. Tachia ne–inaa oodaipia bi jõmarãpa Tachi Ak'õre Ûraa pipiara k'awaadamerã mãik'aapa oodamerã Cristopa oopi bik'a. ²⁴ Apidaapa ne–inaa oodaik'araa bi ichi–it'ee aupai. Ichiaba oopia bi awaraarã k'aripait'ee.

²⁵ Nechiara netodak'ãri chi netopatamã, iidináati mãgí nechiara ata bijida ne–inaa k'irapite wa mãga–e. K'awaa ataruta pirã ma nechiara ata bidap'edaa ne–inaa k'irapite, k'isia p'uadariit'ee. ²⁶ Mãga iididaik'araa bi Tachi Ak'õre Ûraa p'ãdade jara bairã:

‘Na p'ek'au eujã mãik'aapa jõmaweda aide nïbi Tachi Ak'õre–it'ee, ichiata ooda perã.’

(Sal 24.1)

²⁷ Tachi Ak'õre Ûraade mãga jara bairã, Cristode ijãak'aa bipa parãdepema aba atee k'inia bi pirã ichi temaa nek'ode, mãik'aapa pi wã

k'inia bi pirã, wáji máik'aapa k'óji árapa teeruta. K'ísianáaji máik'aapa iidináaji ma nechiarã ata bijida ne–inaa k'írapite wa mǎga–e. ²⁸Mamída mama bide awaraapa pimaa jarai: “Nǎgí nechiarã ata bijida ne–inaa juapa ooda k'írapite, ai k'írapite it'aa t'ípata”. Mǎga jararu pirã, pia ma nechiarã k'oik'araa bi, mǎgí eperã k'ísia p'uapiamaapa. ²⁹Mia mǎga jara–e bi pi k'ísia p'ua bai jǎak'aapa; jíp'a chi apemamaa k'ísiapiamapa parãpa k'achia oodai mǎgí nechiarã k'oruta pirã.

Mamída pia iidii: “¿K'áare–it'ee mia oopia bima awaraarãpa oopi k'inia p'anik'a, áchi k'ísia p'ua p'anadairã? ³⁰¿Pia–e bik'ã, Tachi Ak'õremaa gracias jarap'eda k'oit'ee ne–inaa k'íra t'ádo? Pia bi pirã, ¿mia, sǎap'eda ooima awaraapa oopi k'inia bik'a?” Mia jarait'ee sǎap'eda mǎga oodaipia bi. ³¹Tachia ne–inaa k'odak'ári maa–e pirã todak'ári maa–e pirã ne–inaa awaraa oodak'ári, jõmaweda oodaipia bi Tachi Ak'õre–it'ee, jõmaarãpa iru waaweedamerã. ³²Mapa parãpa piata oodaipia bi judiorã k'írapite máik'aapa judio–eerã k'írapite máik'aapa awaraa ijãapataarã k'írapite, ne–inaa k'achia oo k'inia p'ananaadamerã parã k'aurepa. ³³Mia jiripari mǎga ooit'ee. Ne–inaa oo–e michi–it'ee aupai. Jõma oopari awaraarã k'aripait'ee, árapa Cristode ijãadamerã. Mǎgá irua ára o k'achiadeepa k'aripa atai.

11 ¹Óoti mia ooparik'a, mia oopari perã Cristopa jarateedak'a na p'ek'au eujãde nipak'ári.

Sǎga oodaipia bi ijãapataarã it'aa t'ídait'ee pak'ári

²Írá mia jara k'inia bi parãpa pia oo p'ani, k'írapa p'anadairã mi sǎga bapari parã ome bak'ári. Mi o–ía bi parã ome, at'ári oopata perã mia jarateedak'a. ³Mamída k'inia bi parãpa pipiara k'awaadamerã Tachi Ak'õre jõmaarã k'áyaara waibiara bi. Cristo iru jua ek'ari bi máik'aapa imik'íraarã Cristo jua ek'ari p'ani máik'aapa wëraarã áchi imik'íraarã jua ek'ari p'ani. ⁴Maperã parã ijãapataarã chip'edaidak'ári, imik'írapa ichi poro wǎk'aik'araa bi it'aa t'ímaa bak'ári maa–e pirã Tachi Ak'õrepa jarapiru jaramaa bak'ári. Ichi poro wǎk'aru pirã, ak'ípiit'ee ichia waawee–e ichi poro waibia Cristo. ⁵Jõdee wërapa ne–inaa ichi porode jǎipia bi, it'aa t'ík'ári maa–e pirã Tachi Ak'õrepa jarapiru jarak'ári. Ichia wǎk'apari jǎ–e bi pirã, ak'ípii ichi imik'íra waawee–e bi. Ma awara awaraarãpa mǎgí wëra ak'ídak'aa pait'ee wëra piak'a, wëra poro wëpida pia ak'ídak'aa perã. ⁶Mǎgí ijãapari wërapa ichi porode ne–inaa wǎk'apari jǎ k'inia–e bi pirã, ¿pipiara bak'aji–ek'ã ichi puda jida t'íipit'aamerã maa–e pirã wëpit'aamerã, wëra k'achia beerã ome oopatak'a? Mamída k'íra nejasia bi pirã mǎgá bait'ee jõmaarã k'írapite, mǎgara puda t'íipiik'araa bi. Ma k'áyaara ne–inaa wǎk'apari ichi porode jǎipia bi.

⁷Pia jarait'eera, imik'írapa ichi poro wǎk'aik'araa bi ichi Tachi Ak'õre k'írak'a bairã máik'aapa ichi Tachi Ak'õrepa bida perã na p'ek'au eujãde

nĩbi poro waibia bamerã. Jõdee wẽrapa ichi poro wãk'aipia bi ak'ipiit'ee imik'ĩra ichi poro waibia. ⁸Mia mãga jara bi Tachi Ak'õrepa eperã ook'ãri, imik'ĩra naapiara ooda perã, maap'eda wẽra ooji mãgĩ imik'ĩra orrodeepa. ⁹Tachi Ak'õrepa mãgĩ imik'ĩra oo–e paji wẽra k'aripamerã; jĩp'a wẽrata ooji imik'ĩra k'aripamerã. ¹⁰Maperã wẽra Cristode ijãapari pirã, ichi poro wãk'aipia bi. Mãga ook'ãri, ak'ipipari Tachi Ak'õre k'ĩrapite mãik'aapa iru angeleerã k'ĩrapite, ichi bapari imik'ĩra jua ek'ari mãik'aapa Cristo jua ek'ari.

¹¹Mamĩda Cristode ijãadak'ãri, wẽra imik'ĩra ome auk'a p'ani Tachi Ak'õre k'ĩrapite. Mapa chik'aripa p'anapataadaipia bi. ¹²Tachia k'awa p'ani mãgã auk'a p'ani omee weda uchiadap'edaa perã Tachi Ak'õre juadeepa. Chi naapema wẽra uchiaji chi naapema imik'ĩradeepa. Mamãik'aapata imik'ĩraarã uchiapata wẽraarãdeepa t'odak'ãri.

¹³Mãpai, parãpata ak'idaipia bi k'awaadait'ee pia bi wa pia–e bi ijãapari wẽra ne–inaa wãk'apari wẽe porode it'aa t'ĩmerã Tachi Ak'õremaa. ¹⁴Ma awara pãchia oopatade k'ĩsiadak'ãri, k'awa p'ani pia–e bi imik'ĩra puda waree bamerã. ¹⁵Jõdee wẽra puda waree bak'ãri, k'ĩra wãree unupata. Mamĩda Tachi Ak'õrepa mãgã waripi–e paji k'ĩra wãree aupai ak'idamerã; jĩp'a ak'ipiit'ee wẽra ichi imik'ĩra jua ek'ari bi. ¹⁶Apidaapa mia jara aupada ijãa k'iniada–e p'ani pirã, ijãanáati. Mamĩda k'awaadaipia bi taipa jõmaarãmaa mãga jarateepata. Ma awara ijãapataarã apemaarãpa oopata ma jarateepatak'a.

Sãga oodaipia bi Jesucristo piuda k'ĩrãpadait'ee

¹⁷Ĩrã ũraait'ee sãga oodaipia bi parã ijãapataarã cheepurudak'ãri Cristo piuda k'ĩrãpadait'ee. Aĩ naawedapemak'a p'oyaa jara–e pãchia pia oomaa p'ani, mãgã ooda–e p'anadairã. Cristopa oopi k'inia bik'a oodai k'ãyaara, ne–inaa k'achia oomaa p'ani. ¹⁸Mãga jara bi mimaa nepiridap'edaa perã parãdepema ũk'uru cheepurudak'ãri, ne–inaa jedek'odak'aa auk'a k'ĩsiada–e p'anadairã. Mapa awara–awaraa nek'opata. K'ĩsia bi wãara ũk'uru mimaa nepiridap'edaa. ¹⁹Mamĩda mãgã parãdepema ũk'uruurãpa pãchia oo k'iniata ooda–e pada paara, k'awa–e pak'aji chisãgĩrãpa wãara oopata Cristopa oopi bik'a, iru k'inia iru p'anapata perã. ²⁰Mãgã pariatua k'o p'anik'a k'odaik'araa bi. ¡Mãgã Cristo piuda k'ĩrãpadak'aa! ²¹Mimaa nepirijida parãdepemaarã ũk'uru cheepurudak'ãri ne–inaa jedek'odait'ee, apemaarã ijãapataarã nida–ee. Maperãpi ijãapataarã ũk'uru jarra oopata. Jõdee awaraarãpa k'opata bi jãwaadarutamaa mãik'aapa vino topata piu p'aneerutamaa. ²²Chi mãga oopataarãmaa iidi k'inia bi: ¿Pãchi te wẽe p'anik'ã nek'odait'ee mãik'aapa todait'ee? ¿Waaweeda–e p'anik'ã pãchi ĩgrete, chi araa che p'anĩrã jida ichiaba? ¿Chupiria chedeerã k'ĩra nejasiapi k'inia p'anik'ã? ¿K'ãata parãmaa jaraima? ¿Pia oo p'anik'ã? ¡Mãga–epi!

Jesupa ooda k'irāpapiit'ee ichide ijāapataarāmaa
(Mateo 26.26-29; Marcos 14.22-25; Lucas 22.14-20)

²³Jesucristopa mimaa jarateeda, mia jōdee parāmaa jarateeki. Ai ewate p'ārik'ua Jesús traicionaadai naaweda, nek'omaa p'anide ichia pan ataji ²⁴māik'aapa it'aa t'iiji gracias jarait'ee Tachi Ak'ōremaa. Ma pan k'ōrat'aaji jedeit'ee māik'aapa māgaji:

—Nāgf pan mi k'ap'ia, mi peepiit'ee perā parā k'aripait'ee. Nāg pan k'odak'āri, k'opatāati k'irāpadait'ee mi piuda parā pari.

²⁵Māgā ichiaba, nek'o aupadap'eda, Jesupa vino copa jitaji māik'aapa māgaji:

—Nāgf vino mi waa, michi waa bat'ait'ee perā mi piuk'āri eperāarā pari. Tachi Ak'ōrepa nāgf ūraa chiwidi jara bi. Michi waa bat'ada k'aurepa irua wēpapiit'ee parāpa p'ek'au k'achia oopata māik'aapa michideerā papiit'ee. Nāgā vino todak'āri, topatāati k'irāpadait'ee mia ooit'ee bi eperāarā pari.

²⁶Māga jarada perā Jesucristopa, tachia ma pan k'odak'āri māik'aapa ma vino todak'āri, k'irāpapata Cristo piuda tachi pari. Māgā oo p'anadait'ee, iru waya cheru misa.

K'irak'aupai pan vino ome pariatua k'odai

²⁷Māga jōmaarāmaa ak'ipipata perā, eperāpa ma pan pariatua k'oru pirā maa—e pirā ma vino pariatua toru pirā, k'achia oomaa bi, ichi—it'ee p'ua—e bairā Cristo piuda jōmaarā pari. ²⁸Maperāpi Cristode ijāapari chaa ma pan k'oi naaweda māik'aapa ma vino toi naaweda, ichi t'āridepai k'isiaipia bi k'awaait'ee wāara k'oru māik'aapa toru k'irāpait'ee Cristo piuda ichi pari wa māga—e. ²⁹Māgā oopia bi Tachi Ak'ōrepa miapiit'ee perā ma pan pariatua k'opataarā māik'aapa ma vino pariatua topataarā, chik'o jip'aa k'opatak'a. ³⁰Parādepema chok'ara māgā pariatua k'opata perā, k'ayaa p'ani māik'aapa ūk'uru jai—idaa p'ani. ³¹Mamīda māgī k'odai naaweda māik'aapa todai naaweda, k'isiaruta pirā oo amaadait'ee tachia p'ek'au k'achia oopata, Tachi Ak'ōrepa tachi miapi—e pait'ee. ³²Māga oodak'āri, pariatua k'oda—e pait'ee. Tachi Ak'ōrepa miapipari ma pan pariatua k'opataarā māik'aapa ma vino pariatua topataarā, āchia k'awaadamerā irua oopi k'inia bi. Māga k'awaadak'āri māik'aapa oodak'āri, irua āchi k'aripait'ee atuanaadamerā ijāadak'aa beerāk'a, eperāarā jōmaweda panadak'āri iru k'irapite.

³³Mapa ipemaarā, cheepurudak'āri pan k'odait'ee māik'aapa vino todait'ee Cristo piuda k'irāpadait'ee, nipatāati jōmaweda cherutamaa, chik'inia ne—ināa jedek'odait'ee. ³⁴Apida jarrapisia bi pirā, chei naaweda, ichi temāi nek'oipia bi. Parāpa māga ooruta pirā, Tachi Ak'ōrepa miapi—e pait'ee pariatua k'o p'ani k'aurepa.

Mi parāmaa wāk'āri, waapiara jarateeit'ee.

Tachi Ak'öre Jaurepa ne–inaa oopipari Cristode ijäapataarāmaa

12 ¹Írá ñpemaarā, p'anaut'ee parāpa iidi pëidap'edaa. Iidijida k'āata oopipari Tachi Ak'öre Jaurepa Cristode ijäapataarāmaa. Nāgí jarateeit'ee pia k'awaadamerā.

²K'irāpa p'ani parā p'anapatap'edaa Cristode ijāadai naaweda. Tachi Ak'öre k'irapite k'achia oopachida it'aa t'ipatap'edaa perā ne–inaamaa, Tachi Ak'öre awara. Māga oopachida māgee ne–inaa pedeedak'aa beemaa, chok'ai–e p'ani mīda. ³Māga oopachida pia k'awadak'aa pada perā sāga Cristode ijāadait'ee māik'aapa sāga oodait'ee irua parāmaa oopi k'inia bik'a. K'awapatāati Tachi Ak'öre Jaurepa eperāarāmaa nāga jarapik'aa: “Jesús Tachi Ak'öre Warra–e”. Jip'a jarapipari: “Jesús Tachi Poro Waibia.”

⁴Parāpa k'awaadaipia bi Tachi Ak'öre Jaurepa Cristode ijäapataarāmaa ne–inaa k'ira t'ādoo oopipari chik'aripa p'anapataadamerā. Māga oopari ne–inaa pia oo k'inia bairā ijäapataarā–it'ee. ⁵Ichia ma ne–inaa jōma oopipari Cristo, Tachi Poro Waibiapa oopi k'inia bik'a. ⁶Ijāapari chaa ma ne–inaa awara ooi ichi k'öp'āyo k'āyaara. Mamīda Tachi Ak'órēpata ma ne–inaa ichita āramaa oopipari. ⁷Māgá Tachi Ak'öre Jaurepa ma ne–inaa awara–awaraa oopipari Cristode ijäapataarāmaa, āchi chik'aripa p'anapataadamerā. ⁸Abaamaa k'ísia k'awaapipari jarateemerā ne–inaa Tachi Ak'órepa k'awapi k'inia bi. Awaraarāmaa pipiara k'awapipari Tachi Ak'órepa wāarata jara pëida, māga jarateemerā. ⁹Ichiaba Tachi Ak'öre Jaurepa waapiara ijāapipari Cristode ijāa bīmaa, k'awaamerā wāara uchiait'ee Tachi Ak'órepa jara bik'a, waide unu–e bi mīda. Ichiaba awaraarāmaa k'ayaa beerā jipapipari. ¹⁰Ma awara awaraarāmaa ne–inaa oopipari eperāarāpa p'oyaa oodak'aa āchi juadoopa. Awaraarāmaa jarapipari Tachi Ak'órepa jarapi bik'a. Awaraarāmaa k'awapipari eperāpa wāara jaratee bi Cristopa oopi bik'a wa netuarapa oopi bik'a. Awaraarāmaa pedeepipari irua k'awa–e bi pedeede, jarateemerā Tachi Ak'öre Ūraa māgá pedee bīpa. Awaraarāmaa k'awapipari k'āata jara bi ma eperāpa, pedee irua k'awa–e bita pedeek'āri, jōmaarāpa k'awaadamerā irua jara k'inia bi. ¹¹Māgá oopari Tachi Ak'öre Jaurepa. Irua aupaita k'awapipari Cristopa oopi k'inia bi ichide ijäapataarāmaa.

Cristode ijāadak'āri, tachi k'ap'ia apai pik'a p'ani

¹²Írá jarait'ee sāap'eda Tachi Ak'öre Jaurepa māgá ne–inaa awara–awaraa oopipari Cristode ijäapataarāmaa. Tachi k'ap'ia apai bi mīda, aide nāgee paraa: biiri, poro, jua, t'āri; jāga bee chok'ara. Māga pik'a Cristo apai bi mīda, irude ijäapataarā araa p'anapata iru ome. K'ap'ia apai pik'a p'ani, chok'ara p'ani mīda. ¹³Tachi ijäapataarā māga p'ani ijāapari chaa Cristode ijāa beek'āri, Tachi Ak'öre Jaurepa iru araa bapipari

perã apemaarã ijãapataarã ome. Auk'a oopari judiorã ome, judio–eerã ome, esclavoorã ome, esclavo–eerã ome. Mãga oopari, chok'ara p'ani mĩda, apai pik'a p'anadamerã Cristo ome. Mapa tachia poro choopipata ak'ipidait'ee araa p'ani Cristo ome Tachi Ak'õre Jaure k'aurepa.

¹⁴Tachi eperã k'ap'iade bi poro, jua, biiri mãik'aapa t'ãri. Jãgee jõmaarãpa k'aripapata tachia ne–inaa oodamerã. Mãga pik'a tachi ijãapataarã chok'ara p'ani mĩda, chik'aripa p'anapata Cristo–it'ee ne–inaa oodait'ee. ¹⁵K'ĩsiadãma nãgĩde. Tachi biiri pedeeda paara, jarak'aji: “Juapa mi k'ãyaara ne–inaa chok'araara oopari perã, mi mak'iara servi–e bi na k'ap'iade.” Mãga jarak'aji mĩda, at'ãri tachi k'ap'iade bi. ¹⁶Maa–e pirã tachi k'iiri pedeeda paara, jarak'aji: “Tau mi k'ãyaara pipiara bairã, mi mak'iara servi–e bi na k'ap'iade.” Mãga jarak'aji mĩda, at'ãri tachi k'ap'iade bi. ¹⁷Tachi k'ap'ia jõma tau pada paara, k'iiri wẽ–e pak'aji ũridait'ee mãik'aapa jõma k'iiri pada paara, k'ĩ wẽ–e pak'aji idait'ee. ¹⁸Mamĩda mãga–e. Tachi Ak'õrepa tachi k'ap'iade nĩbi jõmaweda biji mãgĩ bimãi, ichia k'ĩsia iru badak'a. ¹⁹Tachi k'ap'ia jõmaweda biiri maa–e pirã jua maa–e pirã tau pada paara, k'ap'ia wẽe p'anak'ajida. ²⁰Mamĩda mãga–e. Ne–inaa k'ĩra t'ãdo paraa mĩda, ichita k'ap'ia apai bi.

²¹Tachi k'ap'ia mãga bi perã, tachi tau pedee k'awaa bada paara, p'oyaa jara–e pak'aji juamaa: “Mia pi k'inia–e”. Poropa pida p'oyaa jara–e pak'aji biirĩmaa: “Mia pi k'inia–e.” ²²Ma k'ãyaara ne–inaa jõma tachi k'ap'iade, mak'iara p'oyaa ooda–e pik'a k'edee paara, auk'a k'aripapata tachi k'ap'ia chok'ai bamerã mãik'aapa k'ap'ia pia bamerã. ²³Ma awara tachi k'ap'iade nĩbi ũk'uru pia chi–oopata tachi piara unudamerã. Mamĩda ũk'uru awaraarãmaa unupi k'iniadak'aa. Mapa wãk'apata p'arupa. ²⁴Jõdee chi unupi k'inia bita taawa iru p'anapata. Mãga oopata Tachi Ak'õrẽpata tachi k'ap'ia mãga ooda perã, pipiara iadamerã aide nĩbi mak'iara p'oyaa oo–e pik'a k'edee mãik'aapa pia–e pik'a k'edee. ²⁵Mãga ooji tachi k'ap'iade nĩbi jõma chik'aripa p'anadamerã. ²⁶Tachi k'ap'iade bi apida p'ua nĩbeeru pirã, k'ap'ia jõmaweda miapari ma k'aurepa. Jõdee tachi k'ap'iade nĩbi apida pi–ia unuruta pirã, k'ap'ia jõmaweda o–ĩadaipari.

²⁷Ma jõma jara aupadade k'ĩsiadak'ãri, k'awa p'ani tachi ijãapataarã Cristo k'ap'iak'a p'ani, iru ome araa p'anapata perã. ²⁸Tachi Ak'õrepa tachi k'ap'iade nĩbi chaa mimia awara–awaraa biji tachi k'aripamerã mãik'aapa k'ap'ia pia p'anadamerã. Mãga pik'a ichi Jaurepa Cristode ijãapataarãmaa mimia awara–awaraa bĩpari, ma mimia oo p'anide chik'aripa p'anapataadamerã. Naapiara bĩpari Jesucristopa jirit'eradaarã peiit'ee ichi ũraa jarateede; ai eere bĩpari Tachi Ak'õrepa jarapi bĩk'a jarapataarã; mãgĩ t'ẽe bĩpari Tachi Ak'õre ũraa jarateepataarã; maap'eda ne–inaa oopataarã eperãarãpa p'oyaa oodak'aa ãchi juadoopa; k'ayaa

beerã jipapataarã; ijãapataarã k'aripapataarã; ijãapataarã ak'ipataarã; pedeepataarã ãchia k'awada–e p'ani pedeede. ²⁹Tachi Ak'õrepa ijãapataarã jõmaweda jirit'era–e Cristopa pëimerã ichi ùraa jarateede. Ichiaba jõmaarãmaa ichia jarapi bik'a jarapi–e; jõmaarãpa iru ùraa jarateeda–e; jõmaarãpa ne–inaa ooda–e eperãarãpa p'oyaa oodak'aa ãchi juadoopa; ³⁰jõmaarãpa k'ayaa beerã jipada–e; jõmaarãpa pedeeda–e ãchia k'awada–e p'ani pedeede; jõmaarãpa k'awada–e chi pedeerupa jara k'inia bi ma k'awada–e p'ani pedeede. ³¹Maperã parãpa iididaipia bi Tachi Ak'õre Jaurepa parãmaa madepema pipiara bita bimerã. Mägã pipiara p'anapataadait'ee.

Mägã oo p'ani mïda, mia ak'ipit'ee sãga wãara pipiara p'anapataadai.

Chik'inia p'anapataadaipia bi

13 ¹Pipiara p'ana k'inia p'ani pirã, chik'inia p'anapataadaipia bi. Tachia eperãarã pedee k'ira t'ãdoo pedee p'ani mïda mãik'aapa angeleerã pedee paara pedeeruta pijida, pari mãga oopata t'ãripa awaraarã k'inia iru p'anada–e p'ani pirã. Mãga p'anaruta pirã, tachi ma pedeede pedeedak'ãri, awaraarãpa ùridai campana pariatua chaaparik'a. ²Ichiaba Tachi Ak'õrepa jarapi bik'a jara p'ani mïda mãik'aapa k'awa p'ani mïda ne–inaa k'ira t'ãdoo, Tachi Ak'õrepa waide jara–e bi paara eperãarãmaa, páripì p'anapata awaraarã k'inia iru p'anada–e p'ani pirã. Ma awara audú ijãaruta pijida ee ãyaa birutamaa tachia jararutapa; awaraarã t'ãripa k'inia iru p'anada–e p'ani pirã, ichi k'inia mãga oo p'ani. ³Ma awara tachia net'aa iru p'ani jõmaweda tee p'ani mïda chupiria chedeerãmaa mãik'aapa tachi k'ap'ia paara paapeepiruta pijida Cristode ijãa p'ani k'aurepa, t'ãripa awaraarã k'inia iru p'anada–e p'ani pirã, tachi–it'ee wë–e pait'ee Tachi Ak'õrepa k'isia iru bidepema, it'ari panadak'ãri.

⁴Tachia wãara awaraarã k'inia iru p'anadak'ãri, nãga p'anapata. T'ãridepai choopata. Awaraarãmaa ne–inaa pia oopata. Awaraarã unuamaa iru p'anadak'aa, ãrapa ne–inaa iru p'ani k'aurepa. Ichiaba tachia ooda jõmaarãmaa jaradak'aa, ãrapa k'isiadamerã tachia ne–inaa oo k'awaa p'anapata. Audua p'anadak'aa. ⁵Chãra k'iraupidak'aa mãik'aapa k'ira nejasiapidak'aa. Tachi–it'ee ne–inaa pipiara jiridak'aa. Isapai k'iraudak'aa. K'ira p'u–ua p'anadak'aa tachimaa chãrapa ne–inaa k'achia ook'ãri. ⁶O–ia p'anadak'aa unudak'ãri awaraapa ne–inaa k'achia oomaa bi. Jip'a o–iadaipata irua ook'ãri Tachi Ak'õrepa wãarata jara pëidak'a. ⁷Ma awara chãrapa tachi miapidak'ãri, choopata ijãapata perã Ak'õrepa tachi k'aripait'ee. Ijãapata k'achia p'oyaadai. T'ãride ichita choopata awaraarã k'inia iru p'anadairã.

⁸Mägã awaraarã k'inia iru p'anadak'ãri Cristopa oopi bik'a, ichita chik'inia para bait'ee. K'awáati na ewari Tachi Ak'õrepa jarapi bi waa wë–e pait'ee. Ma awara chi pedee bipa k'awada–e p'ani pedee waa

ürida–e pait'ee. Ichiaba k'isia k'awaa p'aniiräpa jarateepata auk'a waa wē–e pait'ee. ⁹Māgí jōma na ewari wē–e pait'ee, jōdait'ee perā. Tachia waide k'awada–e p'ani jōmaweda Tachi Ak'ōrepa jarapi bi māik'aapa k'isia k'awaa beeräpa jaratee p'ani. ¹⁰Mamīda Tachi Ak'ōrepa k'isia iru bi jōmaweda oo aupak'āri, waa k'awa k'iniada–e p'anadait'ee irua jarapi bi māik'aapa k'isia k'awaa beeräpa jaratee p'ani, jōmaweda Cristok'a k'awadait'ee perā.

¹¹Warra weda mi pedeeji māik'aapa k'isia iru baji ne–inaa ooit'ee warraräpa oopatak'a. Mamīda chona pak'āri, oo amaaji māgee warra weda ne–inaa oopata. ¹²Na p'ek'au eujāde p'ani misa, jip'a espejo k'ira t'awaa bide ak'i p'anik'a bi, jōmaweda Tachi Ak'ōrepa k'isia iru bi k'awada–e p'anadairā. Mamīda Cristo ome p'ananadak'āri, jōmaweda k'awadait'ee Cristopa k'awa bik'a, k'awadait'ee perā Tachi Ak'ōrepa tachi k'awa bik'a.

¹³Maperā ichita ijāadaipia bi Tachi Ak'ōrepa oopari ichia jara bik'a. Ichita ijāadaipia bi Tachi Ak'ōrepa tachimaa teeit'ee ne–inaa jōmaweda ichia k'isia iru bi tachi–it'ee, it'ari panadak'āri. Ichita awaraarā k'inia iru p'anadaipia bi Tachi Ak'ōrepa k'inia iru baparik'a. Tachi Ak'ōre–it'ee ma jarada ōpedepema chi t'ēe jara aupadata pipiara bi jōma apema jara aupada k'āyaara.

Chik'aripa p'anadaipia bi Tachi Ak'ōre Jaurepa oopi bik'a oodait'ee

14 ¹Māga pipiara bairā Tachi Ak'ōre–it'ee, parāpa awaraarā k'inia iru p'anadaipia bi. Māga oo p'ani misa, iididaipia bi Tachi Ak'ōre Jaurepa parāmaa jarapimerā Tachi Ak'ōrepa jarapi bik'a. ²Ma k'āyaara, iidiruta pirā Tachi Ak'ōre Jaurepa parā pedepimerā k'awada–e p'ani pedeede, māgá jarateedak'āri, chi ūrirutaarāpa k'awada–e p'anadai māgí jarateeruta. Tachi Ak'ōrepapai k'await'ee. ³Jōdee Tachi Ak'ōre Jaurepa jarapiru pirā irua jarapi bik'a, chi ūrirutaarāpa pia k'awaadait'ee, āchi pedeede ūridait'ee perā. Mapa oo k'inia p'anadait'ee māgí jarateeruta jara p'anik'a māik'aapa t'āri o–īa p'anadait'ee oodak'āri Cristopa oopi bik'a. ⁴Chi pedee bipa ichia k'awa–e bi pedeede pia oo bi ichi–it'ee. Mamīda Tachi Ak'ōrepa jarapi bik'a jaraparipa apemaarā ijāapataarā k'aripapari. ⁵Parā jōmaweda pedeeda paara k'awada–e p'ani pedeede, pia bak'aji. Mamīda pipiara bi Tachi Ak'ōrepa jarapi bik'a jaradamerā, wē–e pirā apidaapa māgí pedee ūridamerā māik'aapa k'awapidamerā apema ijāapataarāmaa.

⁶Mapa ipemaarā, mi parāmaa wāru pirā jarateede k'awa–e bi pedeede, parā k'aripa–e pait'ee. Jōdee wāru pirā Tachi Ak'ōrepa jarapi bik'a jarade maa–e pirā Cristo ūraa jarateeru pirā, māgá k'awaadai Cristopa oopi k'inia bi.

⁷Parāpa k'awa p'ani siru chaa k'awaa beeräpa māik'aapa arpa chaa k'awaa beeräpa pia chaapata chi ūri p'aniiräpa k'awaadamerā chisāgí

sirupa chaada mäik'aapa chisāgí arpapa chaada. Mamīda pia chaa k'awa–e bīpa chaak'āri, k'achia ūridai mäik'aapa pia k'awada–e pai chisāgí siru wa chisāgí arpa. ⁸Ichiaba soldaorāpa trompeta atEEPata jura chōonadak'āri. Chi chaa k'awaa bīpa chaapari soldaorā chōode uchiadamerā. Mamīda māgīpa pia chaa–e pirā, soldaorā chōode uchiada–e pai, k'awada–e p'anadairā āchia ūri p'ani k'āata jara k'inia bi. ⁹Māga pik'a bi parā ome. K'awada–e p'ani pedeede pedee p'anadak'āri, chi ūrirutaarāpa k'awada–e pai parāpa jaratee k'inia p'ani. Pīpiara bak'aji pāchi ituaba pedeedap'edaa paara. ¹⁰Wāara na p'ek'au eujāde eperāarā pedee chok'ara awara–awaraa pedee p'ani. Ma pedee pedeepataarāpa pia k'awapata āchi pedee ūridak'āri. ¹¹Mamīda mia māgí pedee ūri–e bi pirā, k'īra tewaraak'a bai māgí pedeepari ome, p'oyaa ūri–e bairā māgí pedee. ¹²Māga bi parā ome ichiaba. Maperāpi iidi k'inia p'ani pirā Tachi Ak'ōre Jaurepa parāmaa ne–inaa oopimerā, iididaipia bi ne–inaa k'aripadait'ee apemaarā ijāapataarā.

¹³Mamīda iidi k'inia p'ani pirā Ak'ōrepa pedeepimerā k'awada–e p'ani pedeede, māgara ichiaba iididaipia bi k'awapimerā k'āata jara k'inia bi māgí pedee. Māgá awaraarāmaa jarateedai. ¹⁴Mia it'aa t'īru pirā k'awa–e bi pedeede, mi jaurepapai k'awa bi k'āata jara k'inia bi, araa bapari perā Tachi Ak'ōre Jaure ome. Mamīda michi k'īsiade k'awa–e bi. ¹⁵Māgara mia ¿sāga ooima? Jaurepapai it'aa t'īit'ee mäik'aapa k'ariit'ee mia k'awa–e bi pedeede. Mamīda ma k'āyaara pīpiara it'aa t'īpariit'ee mäik'aapa k'aripariit'ee mia k'awa bi pedeede. ¹⁶Pia pida māga ooru pirā, eperā pi ik'aawa su–ak'i bīpa auk'a k'awaait'ee pia gracias jara bi mäik'aapa k'ari bi. Māgá pi ome auk'a iru it'aa t'īi gracias jarait'ee Tachi Ak'ōremaa. ¹⁷Jōdee pia it'aa t'īru pirā k'awa–e bi pedeede, pia bi mīda Tachi Ak'ōre k'īrapite, pi ik'aawa p'aniirā maarepida k'aripa–e bi.

¹⁸Tachi Ak'ōre k'īrapite mi o–īa bi, mia parā k'āyaara pedee chok'araara pedeepari perā, mia k'awa–e bi pedeede. Māga ooi Tachi Ak'ōre Jaurepa māga oopipari perā. ¹⁹Mamīda apemaarā ijāapataarā ome bak'āri it'aa t'īit'ee Tachi Ak'ōremaa, mi–it'ee pīpiara bi pedeeit'ee pedee joisomaapai arii p'aniirā pedeede, pedee diez mil pedeei k'āyaara ārapa k'awada–e p'ani pedeede.

²⁰Maperā ipemaarā, warra chak'eerāk'a k'īsianáati. Ārak'a p'ana k'inia p'ani pirā, p'anadaipia bi warra ewaa t'odak'a; audua–ee. Pia k'īsiati chonaarāpa k'īsiapatak'a. ²¹K'īrāpāti Tachi Ak'ōre Ūraa p'ādade jara bi: "Tachi Ak'ōrepa jara bi: "Mia Israel pidaarāmaa pedeeit'ee k'awada–e p'ani pedeede k'īra tewaraarā it'aideepa. Mamīda ma Israel pidaarāpa k'awa p'anadait'ee mīda mia māga oopi bi, at'āri mi pedee ūri k'iniada–e p'anadait'ee." ' (Is 28.11-12)

²²Tachi Ak'ōrepa māga jarada perā, nāga k'awaadai. Ijāadak'aa beerāpa unuruta pījida Tachi Ak'ōre Jaurepa parāmaa pedeepimaa bi pāchia

k'awada-e p'ani pedeede, ma Israel pidaarāk'a ārapa ūri k'iniada-e pait'ee. Jōdee ijāapataarāpa māga unudak'āri, ūridait'ee, k'awada-e p'ani mīda k'āata jara k'inia bi. Mamīda ma k'āyaara parāpa jararuta pirā Tachi Ak'ōrepa jarapi bik'a āchi pedeede, audupīara ūri k'inia p'anadait'ee, ūridait'ee perā āramaa Cristopa oopi k'inia bi. Māga bi ijāadak'aa beerā ome ichiaba. ²³K'īsīati nāgide. Parā cheepurudak'āri it'aa t'īdait'ee, parādepema ūk'uru pedeemaa p'aneeruta pirā k'awada-e p'ani pedeede māik'aapa māga p'anide t'īuru pirā eperā ijāak'aa bi maa-e pirā Tachi Ak'ōre Ūraa waide k'awa-e bi, ichia k'īsīai parā jōmaweda k'īra k'awa-ee para bi. ²⁴Jōdee eperā ijāak'aa bi maa-e pirā Ak'ōre Ūraa waide k'awa-e bi t'īuru pirā Tachi Ak'ōrepa jarapi bik'a jara p'anide, ūrii ichia p'ek'au k'achia oopari Tachi Ak'ōre k'īrapite. ²⁵Maap'eda māgide k'īsīak'āri, t'āri p'uadarii māik'aapa ijāai, wa ijāa-e pai. Maap'eda bedabaidarii Tachi Ak'ōremaa it'aa t'īit'ee māik'aapa jarait'ee: “Wāara Tachi Ak'ōre nama parā ome bapari.”

Chip'edaidak'āri, ne-inaa jōma k'īra jīp'a oodaipia bi

²⁶Māpai īpemaarā, nāga oodaipia bi chip'edaidak'āri it'aa t'īdait'ee. Ūk'uruurāpa Ak'ōre k'ari k'aridaipia bi. Awaraarāpa Cristo ūraa jarateedaipia bi maa-e pirā Tachi Ak'ōrepa jarapi bik'a jaradaipia bi. Awaraarāpa k'awada-e p'ani pedeede pedeedaipia bi Tachi Ak'ōre Jaurepa oopi bik'a. Awaraarāpa māgī pedee jara k'inia bi jōmaarāmaa k'awapidaipia bi Tachi Ak'ōre Jaurepa oopi bik'a. Ma jōmaweda oodaipia bi ijāapataarā chik'aripa p'anadamerā. ²⁷Ma k'awada-e p'ani pedeede pedeepataarā pedeedaipia bi aba-abaa, omé maa-e pirā ōpee pedee aumarutamaa. Maap'eda māgī pedee k'awapataarāpa jōmaarāmaa k'awapidaipia bi ārapa jaradap'edaa. ²⁸Apida wē-e pirā māgī pedee k'awaapiit'ee k'āata jara k'inia bi, māgara chi māgá pedee bi waa pedeeik'araa bi. Ma k'āyaara ichi t'āridepai pedeeipia bi ichi-it'ee māik'aapa Tachi Ak'ōre-it'ee. ²⁹Māgá ichiaba Tachi Ak'ōrepa jarapi bik'a jarapataarāpa pedee k'inia p'ani pirā, pedeedaipia bi aba-abaa, omé maa-e pirā ōpee pedee aumarutamaa. Apemaarāpa ūridaipia bi ārapa jararuta, k'awaadait'ee wāara Tachi Ak'ōrepa jarapida wa māga-e. ³⁰Abaapa Tachi Ak'ōrepa jarapi bik'a jara bi misa, awaraapa pedee k'inia bi pirā jarapida awara, māgara ma naa pedee badapa chi t'ēepemamaa pedeeipia bi. ³¹Māga oo p'ani pirā, jōmaarā pedee k'inia p'aniirā pedeedait'ee, apemaarā ijāapataarāpa k'awaadamerā jōmaweda Tachi Ak'ōrepa āramaa jara k'inia bi. ³²Tachi Ak'ōrepa jarapi bik'a jara bīpa pariatua pedeeik'araa bi. Jīp'a pedeeipia bi Tachi Ak'ōre Jaurepa māga oopi bak'āri. ³³Māga oodaipia bi Tachi Ak'ōrepa ne-inaa pariatua oopik'aa perā. Oodaipia bi awaraa p'uurudepema ijāapataarāpa oopatak'a.

³⁴Mapa ichiaba chip'edaidak'ári it'aa t'ídait'ee, wēraarā k'íup'ee p'anadaipia bi, jarateepataarā māik'aapa Tachi Ak'ōrepa jarapi bik'a jarapataarā pedee p'ani misa, Tachi Ak'ōre Ūraa p'ādade jara bairā āchi imik'íraarā jua ek'ari p'anapataadaipia bi. ³⁵Mapa ārapa ne–inaa iidi k'inia p'ani pirā, iididaipia bi āchi imik'íramaa teeda panadak'ári. Pia–e bi pariatua pedeedamerā, awaraarā pedee p'ani misa.

³⁶Auk'a k'ísiada–e p'ani pirā, k'irāpāti parāmaa ijāapii naaweda Tachi Ak'ōrepa awaraarāmaa ijāapiji māik'aapa k'awapiji ichia oopi k'inia bi chip'edaidak'ári. Maperā k'írak'aupai pāchia oo k'iniata oodai, Tachi Ak'ōrepa k'awapida oodai k'āyaara. ³⁷Apida k'ísia bi pirā ichiata Tachi Ak'ōrepa jarapi bik'a jarapari, maa–e pirā ne–inaa awara oopari Tachi Ak'ōre Jaurepa oopi bik'a, k'awaai pia bi Tachi Ak'ōrepa mimaa jarapiji jōma na p'ādade jara bi. Mapa oopia bi na ūraade jara bik'a. ³⁸Mamída māgí eperāpa jara bi pirā mia na p'ā bide jarateemaa bi michi k'ísiadoopa, irua jara bi ūridaik'araa bi.

³⁹Māpai ípemaarā, audupiara iididaipia bi Tachi Ak'ōre Jaurepa jarapimerā Ak'ōrepa jara k'inia bi ijāapataarāmaa. Māga nide abaapa pedee k'inia bi pirā ichia k'awa–e bi pedeede, pedeenapāde adaik'araa bi. ⁴⁰Mamída ne–inaa jōma oodaipia bi Tachi Ak'ōrepa oopi bik'a, pariatua oodai k'āyaara.

Jesucristo piup'eda, chok'ai p'irabaida

15 ¹Írá ípemaarā, k'irāpapiit'ee mia naaweda jarateeda; jōma Jesucristopa ooda tachi k'aripait'ee atuanaadamerā. Parāpa māgí jarateeda ijāajida; māgita at'ári ijāa p'ani. ²Ma jarateeda k'aurepa Tachi Ak'ōrepa parā o k'achiadeepa k'aripa ata wā. Mapa aide ijāapataadaipia bi. Māga–e pirā, pāchi k'inia ijāajida.

³Ma jarateeda k'awaap'eda, mia parāmaa jarateeki, jarateeda pipiara bairā. Nāga bi: Cristo piuji tachia p'ek'au k'achia oopata wēpapiit'ee, Tachi Ak'ōre Ūraa p'ādade jara bik'a. ⁴Ma piuda t'ēpai, māu te uriade iajida māik'aapa ewari ōpeemaa chok'ai p'irabaiji, Tachi Ak'ōre Ūraa p'ādade jara bik'a. ⁵Ma t'ēpai ichia unupiji Pedromaa, maap'eda chi apemaarā k'ōp'āyoorāmaa, ichi ome nipapatap'edaa na p'ek'au eujāde bi misa. ⁶Ai t'ēpai unupiji quinientos audú see nībada ijāapataarāmaa. Māgídepema ūk'urupai jai–idaa p'ani, mamída chi apemaarā at'ári chok'ai p'ani. ⁷Ai t'ēpai unupiji Santiagomaa. Maap'eda unupiji ichia ūraa jarateede pēida eperāarāmaa.

⁸Maap'eda, jōmaarā t'ēe, mimaa ichiaba unupiji, ai naaweda mi k'achia baji mīda. ⁹Māga ooji mi jōmaweda apemaarā pēida k'āyaara ek'ariara bi mīda. Mi–it'ee piara bak'aji Tachi Ak'ōrepa mi jirit'era–e pada paara, mia Cristode ijāapataarā miapipachi perā. ¹⁰Mamída Tachi Ak'ōre t'ári pia bapari perā, mi k'aripaji. Maperā mi apemaarā pēida k'āyaara mimiara

bapari. Mimiak'aa michi k'iradoopa. Jíp'a Tachi Ak'órepa mímāa nāgí mimia oopipari Cristo-it'ee. ¹¹Mi āra k'āyaara audú mimiapari mīda, taipa auk'a jarateepata, ma-it'ee Cristopa tai pēida perā. Māgí jarateedata parāpa ijāajida.

Tachi Ak'órepa piudap'edaarā chok'ai p'irabaipipari

¹²Parāpa k'awa p'ani Tachi Ak'órepa Cristo chok'ai p'irabaipiji, taipa māga jarateedap'edaa perā. Māga bita, ṣsāap'eda ūk'uru parā t'āide p'aniirāpa jara p'anima eperāarā piudap'eda chok'ai p'irabaidak'aa? ¹³¡K'ísíatí! Tachi Ak'órepa eperāarā p'oyaa p'irabaipi–e pirā, māgara Cristo jida p'irabaipi–e pak'aji. ¹⁴Māgara páripi taipa jarateepata Jesucristopa ooda eperāarā k'aripait'ee. Parāpa pida pāchia k'inia irude ijāa p'ani. ¹⁵Ma awara māirāpa jara p'ani wāara pirā, tai seewa–idaa p'ani, parāmaa jarateedap'edaa perā Tachi Ak'órepa Cristo p'irabaipiji. ¹⁶Māirāpa k'ísia p'anik'a Tachi Ak'órepa eperāarā p'oyaa p'irabaipi–e pirā, māgara Cristo jida p'oyaa p'irabaipi–e pak'aji. Māgara Cristo at'āri piu bak'aji. ¹⁷Ma awara Tachi Ak'órepa Cristo p'irabaipi–e paji pirā, māgara parāpa páripi ijāa p'ani Cristo piuda k'aurepa Tachi Ak'órepa pāchia p'ek'au k'achia oopata wēpapii. ¹⁸Māgara awaraa Cristode ijāapataarā jai–idaadap'edaarā auk'a atuak'ajida. ¹⁹Ma jōma wāara pirā māik'aapa na p'ek'au eujādepai Cristode ijāa p'ani pirā, ¡tachi jōmaarā k'āyaara chupiriara p'ani!

²⁰Mamīda māga–e. ¡Tachi Ak'órepa wāara Cristo chok'ai p'irabaipiji! Cristo naapiara ichita chok'ai bapariit'ee, piup'eda māik'aapa p'irabaip'eda. Ma awara Tachi Ak'órepa māga ooda perā Cristo ome, k'awa p'ani tachi jida ichiaba chok'ai p'irabaipiit'ee, Cristode ijāapata perā. ²¹K'ísiadāma nāgide. Eperāpa k'achia ooda k'aurepa, na p'ek'au eujādepemaarā jōmaweda piupata. Jōdee Tachi Ak'órepa awaraa eperā chok'ai p'irabaipida k'aurepa, jōmaweda irude ijāapataarā auk'a chok'ai p'irabaipiit'ee. ²²Pia jarait'eera, Adán k'aurepa jōmaarāta piupata. Jōdee Cristo k'aurepa jōmaweda irude ijāapataarā jai–idaadap'eda, chok'ai p'irabaidait'ee. ²³Mamīda p'irabaidait'ee Tachi Ak'órepa k'ísia iru bik'a. Cristo naapiara p'irabaipiji. Maap'eda Cristo cheru ewate irude ijāapataarā auk'a p'irabaipiit'ee. ²⁴Ma t'ēepai na p'ek'au eujā jōit'ee. Cristopa netuaraarā māik'aapa Tachi Ak'óre k'íra unuamaa iru p'aniirā, chi na p'ek'au eujādepema poro waibiarā jōmaweda p'oyaak'āri, māgíirā ichi Ak'óre jua ek'ari biit'ee. ²⁵Māga pait'ee Cristo na eujā poro waibia pait'ee perā, Tachi Ak'óre k'íra unuamaa iru p'aniirā jōma birumaa ichi Ak'óre jua ek'ari. ²⁶Māgá ook'āripi, eperāarā waa piuda–e pait'ee. ²⁷K'awa p'ani Cristota na p'ek'au eujā poro waibia, Tachi Ak'órepa ichi ūraa p'ādade jara bairā:

‘Ne–inaa jōmaweda pi jua ek'ari bijí: eperāarā, angeleerā māik'aapa netuaraarā paara.’

(Sal 8.6)

Tachi Ak'õre aupaita Cristo jua ek'ari ba–e. ²⁸Mãgá Tachi Ak'õre k'íra unuamaa iru p'aniirã p'oyaap'eda, Tachi Ak'õre Warrapa ooit'ee ichi Ak'õrepa oodak'a ichi ome, nejõmaata iru jua ek'ari bik'ári. Irua nejõmaata biit'ee ichi Ak'õre jua ek'ari, ichi k'ap'ia paara, Tachi Ak'õre jõmaarã k'ãyaara waibiara beemerã.

²⁹Ichiaba nãga k'awa p'ani Cristode ijãapataarã jai–idaadap'eda, chok'ai p'irabaidait'ee. P'irabaida–e pirã, ¿sãap'eda eperãarã ùk'uruurãpa poro choopipatama ijãapataarã jai–idaadap'edaarã pari, chi araada–e padap'edaarã poro choopidait'ee jai–idaadai naaweda? ¡Mãgí jai–idaadap'edaarã p'irabaida–e pirã, páripí ãra pari poro choopipata! ³⁰Ma awara ijãapataarã p'irabaida–e pirã, ¿sãap'eda tai jarateede wãpatama, chi wãrutamaa tai k'íra unuamaa iru p'ani mída? ³¹Wãara ewari chaa mi peedait'ee iru p'ani, jarateepari perã Cristopa ooda jõmaarã k'aripait'ee. Mamída wãara mi o–ia bi k'awa bairã parãpa Jesucristode ijãa p'ani. ³²Ma awara Cristode ijãapataarã p'irabaida–e pirã, páripí mi perã piuji Éfeso p'uurudepemaarã juapa. Mãgiirã ne–animalaarã k'achiarák'api p'ani. Wãara chok'ai p'irabaida–e pirã, mãgara p'anadãma nãgí jarapatak'a:

'Nek'odãma, ne–inaa todãma mãik'aapa tachia oo k'iniata oodãma,
taarã–e perã jõdait'ee.' (Is 22.13)

³³¡Mãga–e! Apidaamaa k'urapináati. Wãara jara p'ani nãga jaradak'ári: “K'õp'ãyo meraa bi pirã k'achia oopataarã ome, auk'a oodai.” ³⁴¡Pia k'ísíati mãik'aapa ak'íti k'ísia k'awaa pik'a p'aniirã parã t'ãide! P'ek'au k'achia oonáati áchia oo p'anik'a jaradak'ári Cristode ijãapataarã p'irabaida–e pait'ee. ¡Mãga jaratee p'aniirãpa waide Cristode ijãada–e p'ani! Mia mãga jara bi parã k'íra nejasiapiit'ee.

Sãga Tachi Ak'õrepa piudap'edaarã p'irabaiipiit'ee

(2 Corintios 5.1-5)

³⁵¿Nãga iidi k'inia p'ani–ek'ã? “¿Sãga Tachi Ak'õrepa piudap'edaarã p'irabaiipiit'eema? ¿Sãga baima chi k'ap'ia p'irabaida?” ³⁶Wãara mãga iidi k'inia p'ani k'ísia k'awada–e p'anadairã. ¿Parãpa nãgí k'awada–e p'anik'ã? Trigo tau maa–e pirã awaraa net'atau uudak'ári, eujãde beraudaipari, t'ono wãru misa. ³⁷Chi k'arra uudak'aa. Jíp'a chi tauta uupata, trigodee wa awaraa net'ataudee. ³⁸Mãgí uup'eda, Tachi Ak'õrepa t'onopipari trigo k'arra wa ne–inaa awaraa, ichia k'ísia iru badak'a net'atau k'íra t'ãdoo ewaa ook'ári. ³⁹Mãga ooji awaraa ne–inaa chok'ai bee ome ichiaba. Ichia k'ísia iru badak'a k'ap'ia k'íra t'ãdoo ooji eperãarãde, ne–animalaarãde, ipanaarãde mãik'aapa chik'ode, mãgá áchi k'ap'ia awara–awaraa iru p'anadamerã. ⁴⁰Ichiaba biji ne–inaa pajãde ichia k'ísia iru badak'a, na p'ek'au eujãdepema ne–inaa awara. Mãgí chaachaa ichi k'íra wãree biji. Mamída auk'a bi–e paji. ⁴¹Ma k'íra

wāree awara–awaraa bijī nāgá: ak'ōrejīru urua awara bi atane īdaa ome māik'aapa atane īdaa lucero īdaa ome awara bi. Ichiaba lucero chaa urua awara bee.

⁴²Māgá Tachi Ak'ōrepa ne–inaa awara–awaraa oodak'a na eujādepema māik'aapa pajādepema, māga pik'a ichiaba awara ooit'ee eperā piuda k'ap'ia chok'ai p'irabaipik'āri. Piuda k'ap'ia iadak'āri, mik'iadaipari. Jōdee chok'ai p'irabaida k'ap'ia waa piuk'aa. ⁴³Ma awara māgí piuda k'ap'ia k'achia bapari mik'iadaipari perā. Jōdee chi chok'ai p'irabaida k'ap'ia k'īra wāree bait'ee. Piuda k'ap'ia p'oyaa mimik'ak'aa. Jōdee chok'ai p'irabaida k'ap'iaapa ne–inaa k'īra t'ādo ooit'ee, Cristopa chok'ai p'irabaida t'ēe oodak'a. ⁴⁴Eperāpa k'ap'ia iru bairā na p'ek'au eujāde bi misa, māgara ichiaba k'ap'ia iru bait'ee Ak'ōre truade. Na eujādepema k'ap'ia piuk'āri, iapata mik'iadaimerā. Mamīda t'ēepai Tachi Ak'ōrepa p'irabaipik'āri, it'aripema k'ap'ia papiit'ee.

⁴⁵Tachi Ak'ōre Ūraa p'ādade jara bi:

'Tachi Ak'ōrepa eperā ook'āri, iru k'īde jārap'uaji chok'ai beemerā.'

(Gn 2.7)

Ma eperā Adán paji. Mamīda Cristo jida t'ījarapata Adán chi t'ēepema, Tachi Ak'ōrepa ichiaba iru chok'ai p'irabaipida perā ichi truade ichita bapariimerā. Ma awara Tachi Ak'ōrepa Cristo bijī irude ijāapataarā chok'ai p'anapariimerā. ⁴⁶Tachi k'ap'ia naapema Adán k'ap'iak'a bi, na p'ek'au eujādepema perā. Jōdee tachi t'ēepema k'ap'ia bait'ee chi t'ēepema Adán apata k'ap'iak'a, Ak'ōre truadepema perā. ⁴⁷Chi naapema Adán yoorodee ooda paji. Mapa na p'ek'au eujādepema paji. Jōdee chi t'ēepema Adán it'aripema paji. Mata cheji na p'ek'au eujādee. ⁴⁸Na p'ek'au eujādepemaarāpa k'ap'ia iru p'ani naapema Adanpa iru badak'a, irudeepa uchiadap'edaa perā. Jōdee it'aa wārutaarāpa k'ap'ia iru p'anadait'ee Cristopa iru bik'a, ichideerā perā. ⁴⁹Māgá na eujādepema k'ap'iaide p'ani misa, Adán bapatak'a p'anapata. Mamīda it'aripema k'ap'iaide p'anadak'āri, Cristo baparik'a p'anapataadait'ee.

⁵⁰Ma jōma jara aupadade k'īsiadak'āri, parāpa k'lawaadaipia bi na p'ek'au eujādepema k'ap'ia p'oyaa t'īuk'aa Tachi Ak'ōre eujāde, ne–inaa mik'iadaipari mama t'īuk'aa perā.

⁵¹Mamīda ūrīti, mia jarait'ee perā ne–inaa Tachi Ak'ōrepa eperāarāmaa waide jara–e bi. Ijāapataarā jōmaweda piuda–e pait'ee. Mamīda wāara jōmaweda k'ap'ia awara padait'ee. ⁵²Māgá padait'ee isapai, tachi tau p'inaru jīak'aata. Māga nide it'aripema trompeta jīwaak'āri, Cristode ijāa jai–idaadap'edaarā jōmaweda p'irabaidait'ee māik'aapa tachi chok'ai p'aniirā k'ap'ia jida awara pak'oodaridait'ee. ⁵³Māga pait'ee na p'ek'au eujādepema k'ap'ia p'oyaa wā–e perā Tachi Ak'ōre eujādee. Mapa māgá it'aripema k'ap'iaata padait'ee, aide uchiadamerā iru eujāde. ⁵⁴Māgá tachi k'ap'ia jōmaweda it'aripema k'ap'ia padaik'āri, unudait'ee Tachi Ak'ōre Ūraa p'ādade jara bik'a:

‘Tachi Ak'õrepa jõmaweda p'oyaaaji. Maperãpi ichia chok'ai
p'irabaipidaarã waa piuda–e pait'ee.’

(Is 25.8)

⁵⁵ Mapa ijãapataarãpa jõmaweda jaradaipia bi Tachi Ak'õre Ũraa p'ãdade
jara bik'a:

‘Tachi Ak'õre jõmaarã k'ãyaara waibiara bi, tachi chok'ai p'anapipari perã,
waa piuda–e pait'ee. Ma awara waa k'isia p'ua k'isiadak'aa, waaweeda–e
p'anadairã miadait'ee tachia p'ek'au k'achia oopata k'aurepa.’

(Os 13.14)

⁵⁶ Mãga jaradaipia bi eperãarã piupata perã ãchia p'ek'au k'achia oopata
k'aurepa. K'awa p'ani jõmaweda p'ek'au k'achia eperãarãpa oopata, ma jõma
jara bairã Tachi Ak'õre Ũraa Moismaa p'ãpidade. ⁵⁷ Mamida Jesucristo piuda
perã tachia p'ek'au k'achia oopata wẽpapiit'ee, mãik'aapa chok'ai p'irabaida perã,
tachi o k'achiadeepa k'aripa ataji. Maperã it'aa t'ipata Tachi Ak'õremaa gracias
jaradait'ee. ¡Irua jõmaarã k'ãyaara waibiara bi, irua k'isia iru bada perã Tachi
Waibia Jesucristo peiit'ee tachi k'aripade!

⁵⁸ Maperã ipemaarã k'iniarã, mia jarateeda ijãa p'anapatãati. Ma awara
ichita óoti Cristopa oopi bik'a, k'awa p'anadairã mãga oodak'ãri, pari ne–
inaa ooda–e pait'ee.

Ijãapataarã–it'ee p'arat'a p'edap'edaa

16 ¹ Īrã jarait'ee sãga p'arat'a p'edaipia bi peidait'ee apemaarã ijãapataarã–
it'ee. Óoti mia jaradak'a Galacia eujãdepema ijãapataarãmaa, ãchi it'aa
t'ipata chaa. ² Tomia ewate parã chaachaa p'arat'a awara bidaipia bi, parãmaa p'aa
p'anidepema. P'arat'a waibia p'aa p'ani pirã, waibia awara bĩti. Mamida mak'ia
p'aada–e p'ani pirã, ma jãak'a awara bidai. Mãga oodaipia bi ewaa p'arat'a
p'enaadamerã mi panak'ãri. ³ Ma awara jirit'eraipia bi parã t'ãidepemaarã, ma
p'arat'a p'edap'edaa ateedamerã Jerusalendee. Mãpai mi parãmãi panak'ãri, k'art'a
p'ã peiit'ee ãra ome Jerusalendee, ijãapataarãpa k'awaadamerã wãara mãirã
parãpa jirit'era. ⁴ Mãga–e pirã, mi jida auk'a ãra ome wãi.

Pablopa k'isia iru bada Corinto p'uurudee wãit'ee

⁵ Mi wãit'ee Macedonia eujãdee ijãapataarã ak'ide. Ma t'ẽepai wã k'inia
bi Corinto p'uurudee parã ak'ide. ⁶ K'isia bi taarãit'ee parã ome p'usa t'ojara
wãyaarumaa. Mãga ooru pirã, k'inia bi mi k'aripadamerã jãmãik'aapa wãk'ãri.
⁷ Arak'atia wiibai k'inia–e parãmãi. Jĩp'a taarã bee k'inia bi, Tachi Ak'õrepa mãga
k'inia bi pirã. ⁸ Nãgaweda k'isia bi beeiit'ee nama Ēfeso p'uurude Pentecostés fiesta
parumaa. ⁹ Nama at'ãri bee k'inia bi nãpema chok'araarãpa mia jaratee bi ũri
k'inia p'anadairã. Mapa jaratee nãbait'ee, chok'ara Tachi Ak'õre k'ira unuamaa iru
p'aniirãpa mãgã jarateepi k'iniada–e p'ani mĩda.

^c **16.8** Judiorãpa *Pentecostés fiesta* oopachida ãchia naapiara ne–uudap'edaa ewadak'ãri.
Chi naa ewadap'edaa tee chepachida Tachi Ak'õre temaa gracias jaradait'ee, irua ma ne–
uu waripida perã mãik'aapa chaupida perã.

¹⁰Timoteo panak'ári parāmaa, auteebai pedéeti iru ome, iru mi ome auk'a Cristo mimia oopari perā. ¹¹Iru oo iru p'anadaik'araa bi. Ma k'āyaara pia ak'i p'anáti māik'aapa k'aripáti, o-īa chemerā apemaarā ijāapataarā ome mia nimaa bimāi.

¹²Parāpa iidi pēijida sāapai tachi ipema Cristo k'aurepa Apolo parāmaa wāit'ee. Mia jaraji wāmerā apemaarā ome parā ak'ide. Mamīda na wādade wā k'inia-e paji. Jua pari bak'árita wāit'ee.

Pablopa jarada na k'art'a p'á auparude

¹³K'irak'aupai apidaapa parā k'achiade baaipidai. Cristode ijāapatáati mia jarateedak'a māik'aapa oopatáati Cristopa oopi bik'a. Pia choopatáati Cristode ijāa p'anide. ¹⁴Ma awara parāpa oo p'ani jōmaweda chik'inia oopatáati.

¹⁵K'awa p'ani Estéfanos ichi te pidaarā ome naapiara Cristode ijāajida Acaya eujāde. Ārapa apemaarā ijāapataarā k'aripapata. ¹⁶Maperā mia k'inia bi āra pāchi poroorāk'a iru p'anadamerā māik'aapa mágá ichiaba iru p'anadamerā apemaarā ijāapataarā ārak'a k'aripapata.

¹⁷Mi o-īa bi chedap'edaa perā Estéfanos, Fortunato māik'aapa Acaico mi k'aripade parā pari. ¹⁸Ārapa mi o-īapi chejida parā o-īapidap'edaak'a. Mapa āra pari Tachi Ak'ōremaa gracias teedāma.

¹⁹Ásia eujādepema ijāapataarāpa salude pēiruta. Ichiaba salude pēiruta Aquilapa Priscila ome māik'aapa āchi tede cheepurupata ijāapataarāpa. ²⁰Nāpema ijāapataarāpa auk'a salude pēiruta. Parā saludaadak'ári, chik'inia saludaapatáati.

²¹Mi, Pablopa nāgí salude p'āru michi juadoopa.

²²Eperā apidaapa Jesucristo k'iniada-e p'ani pirā, Tachi Ak'ōrepa mágí k'achia ooit'ee. Tachi Waibia Cristo, jisapai chéji!^d

²³Mia k'inia bi Tachi Waibia Jesucristopa parā pia ak'i bapariimerā. ²⁴Parā jōmaweda k'inia iru bi Jesucristodeerā perā.

Māgapai paji.

^d 16.22 Griego pedeede: *Maranata*.